

JEHOVA-JAIRE ²

 Halu yemeñi ona cwalo, fa nako nyana, hanze luinamisa litoho zaluna.

² Ndata luna yakwa Lihalimu, lu itumezi, busihu cwana, ka kolo ye lunani, ya kutaha hape kwa ndu ya milapelo, ko luitahisa ili luna ni matata aluna ku Wena, kuli No sepisize ku lu katanyeza mo mwatasa Mali a suluhile. Sona sibaka fela sinosi se si lukisizwe seo Mulimu akile aba ni sona koo muezalibi, kamba mutu kaufela akona ku katanyeza Mulimu, neli mwatasa Mali a suluhile. Kacwalo lutaha ka Libizo la Mulena Jesu, ka kuziba kuli U sepisize kuli haiba—haiba luka kupa sika kaufela ka Libizo leo, sina ni kufiwa. Lwa Ku lumela, Ndate. Tusa ku sa lumela kwa luna. Lu lapela kuli kukopana kwa luna hamoho, busihu cwana, kube kwa kanya ya Mulimu, kuli Mulimu a bubekwe, mi Libizo la Hae li zibwe mwahala sicaba. Kakuli lu kupa ka Libizo la Jesu, yena Mwana Mulimu. Amen.

Mwakona kuina.

³ Ni talima kuli ye ki tohonolo fa kuba mo hape busihu cwana, ni kubona sicaba sesinde sesikopani moo. Ni lumela kuli, ba bulezi kuli neli kubonahalisa kwa libyana. Ni bile ni mikopano, yetatamanu luli, mwahala libaka kaufela za lifasi. Na hupula mwa California, Ni bile ni yemibeli kamba yemilalu kwani kwa Cow Palace, kona mo ba bizeza kwateni. Mi mwahala litikanyo zeshutana, sibaka nyana se si likana batu ba baketalizoho kamba batu baba silezi, kufita fa, kihande, nyangela yetuna ni kufita yelukile lwaba ni yona ka nako iliñwi, neli kwa Bombay, likiti ze mianda ye ketalizoho mwa mukopano ulimuñwi.

⁴ Kono, Bombay, nto yetuna, Mulena luna na pilisize batu babañata. Kambe neluka beya fela likeleke kuba ni swaliso, nelika nga ma Hindu bani ni babañwi cwalo. Mi bani neli bona luli, bo lubiza kuli, “baba salumeli.” Sika kaufela se si sa lumeli ku Mulena Jesu Kreste, lubiza sika seo kuli, “yasa lumeli.” Mi teñi nekuna ni likitiki ze ne amuhezi Kreste, kono nemuka . . . nemusike mwakona kufita kubona.

⁵ Mi cwale kwa Durban, South Africa, ne lubile kwani, ni sicaba, baba seti sauzande mwa pizo iliñwi, musihali ulimuñwi. Koo, lizazi lelitatama, muyemeli wa tolopo, Sidney Smith, wa kwa Durban, ni limota zetuna za ma British babatuba zani ne li tezi fela milamu ya kale ni lika zeñwi zene baitusisa batu kuzamaya, ka limaili zelikana mianda anda. Kamba, ba litisa lisunda sunda, kufita mwa mishitu, mwa likocikala. Ne litezi fela ona zeo.

⁶ Muyemeliwa tolopo a ni biza, ali, “Zamaya fa lihaulo la hao le li talimezi kwa Indian Ocean, kwani kwa hotela,” ali, “mi uka bona nto yeñwi yo si ka bona kale fateni.”

⁷ Mi ki zani kwani limota inge li longilwe kutala, ze ne luka biza kuli, milamu ni tumbeta, ni zeñwi cwalo, kulwala balatiwa ba bona kuzwa mwa matakanyani a mishutu. Mi sicaba sene sili ku zona, zazi la kwa mulaho, ne ba zamaya mwa mulaho wa limbayambaya, inge ba opela kuli *Lumela Feel* mwa mushobo wa bona. Neli pono yetabisa hakalo kubona cwalo.

⁸ Mi teñi mwani nekuna ni madokota. Buñata bwa bona ba tatuba matuku, kuikolwisisa kuli ne ba folile. Ha lulati kubulela ze si zona, kamba kupatalaza lika zesiyo, konji haiba li pakiwa, kuba niti. Lina ni ku pakiwa!

⁹ Ni amuhezi fela liñolo kuzwa . . . fa nako nyana yefitile. Kona li sa zo taha kuna. Ki la butokwa, ki dokota ya bubana hahulu mwa Indiana. Ki wa Katolika, ka tumelo. Mi mwana hae wa mushimani ki muprisita mwa Si. Meinrad sibaka sa balapeli kwa Jasper, Indiana. Yo neli Dr. C. Ackerman. Mi Na yo mukatana mwa musipili wa kuzuma, hañwi. Mi na sa zumile ka myaha ye ilebene, kuzuma kwalata. Na palezwi kufumana ni yekana. Mi busihu bwani, lwa ina kufitela ka tuu kiloko, inge luambola za Mulena.

¹⁰ Ne ni utwile kuli dokota yo naliteni kwani kwa mafulo. Kacwalo ha Ni yo fita teñi kwani, Ne ni libelela kubona ya sina likute mi yasina tokomelo. Kono Na yo katana muuna yomunde luli, mufuta wa muuna yomunde. Ataha kone niinzi, ali, “Naa ki wena Muzwale Branham?”

Mi se Nili, “Eeni, sha, ki Na.”

Mi a ni swala mwa lizoho. A li, “Kina Dr. Ackerman.”

Se nili, “Kihande, Ni tabile hahulu ku ku ziba.”

¹¹ Lwa kala kuambola za Mulimu, ni kuli mane haiba Nali Mulimu, Una ni kusiala ali Mulimu, kusi cwalo Na si Mulimu kusali kusimwa. Mwabona? Mulimu wa kale fela ha ki yomunde kacenu, haiba Ha ki ya swana kwa sicaba kacenu sina mwa Na inezi linako zani.

¹² Kacwalo, mwendi ka sili kiloko, luna, oh, mu—mu muzaisi a to lu zusa. Mi lwayo . . . Ne ni sweli kuzamaisa, hape, kacwalo ne lu na ni kukena mwa musipili, lwa isa baana ba luna kwa libaka zeshutana kone lu ka za zamaisa. Fa musipili wani, Dr. Ackerman na filwe ku na.

¹³ Mi mwa musipili wani, ayema, nako nyana fela lisika pazula kale. Abeya lizoho la hae fa liheta laka, ali, “Muzwale Branham?”

Se nili, “Eeni, sha, dokota.”

¹⁴ Ki hali, "Na ikolwisia hande za Jesu Kreste." Ki hali, "Nina ni mushimani, wa ziba, ki muprisita kwanu kwa sibaka sa bakutazi mwa sikolo se."

Mi se Nili, "Eeni, sha."

¹⁵ Ki hali, "Na ni Mukatolika, ka tumelo. Ni sepa kuli ki yona keleke yeo." Ki hali, "Kihande, Ni lumela kuli haiba—haiba Na li Mulimu, Ki Mulimu wa sicaba kaufela."

¹⁶ Se nili, "Yeo luli ki niti. U bupile batu kaufela. Mi ka Mali alimañwi Aeza linaha kaufela."

¹⁷ Mi ki hali, "Eeni, sha, Na lumela cwalo." Ali, "Ni balile libuka za hao." Ki hali, "Ni beile sepo ku seo. Na lumela, haiba uka kupa Mulimu, kuli anife kwalata kacenu, Ni ka i amuhela." Ali, "Myaha ye ilebene Ni bile ni li zuma; ni swasehile mwa litwa."

¹⁸ Se nili, "Ni ka kupa Mulena kuli akufe iliñwi, dokota. Kona fela ze Ni kona kueza." Mi ha Ni Mu kupa, na mu lapelela. Se nili, "Dokota, ka naini kiloko hase ikwanile hande, kakusasana cwana, Mulena uka kufa kwa—kwa kwalata yena ni manaka ashengile aketalizoho yekima."

Mi ki hali, "Na lumela cwalo."

Kona fela za na ni kueza. "Haiba uka lumela cwalo."

¹⁹ Kacwalo, mulikani ni Na, lwa pahama lilundu, ni kutokomela nako. Ka naini kilono tobolo ya lila. Na bulaile kwalata ya manaka ashengile aketalizoho. Lwa yo mutusa ku i hoha.

²⁰ Wa tisanga bakuli ba hae ku to lapelelwa. Ni amuhezi fela zibiso yeñwi ona fa, kuli una ni mukuli wa kansa, musali ya bulaiwa ki kansa, ubata kumu fufiseza kwanu. Kono Ni ya kwa hae, kamuso muñwi, kasamulaho, lizazi la kamuso muñwi. Kacwalo Na mu bulelela, nali libelela fela kufitela lutaha, lu ka to lapelela musali yoo ha se luli kafoo.

²¹ Kacwalo, mwabona, buñata, haiba taba ikona kutiswa ku mutu ka swanelo hande! Foliso ya mulimu i bile ni litaba zeñata hahulu ze bulezwi ka yona, ni za kufiteleza hahulu tumelo seli kenyizwe mwatereni, inge mo kuinezi mwa lika zeñwi kaufela. Mufuta—mufuta kaufela wa bulapeli kamba nto kaufela, muka fumana za kufiteleza tumelo.

²² Neba mwahala ba Mohammedan, muka fumana kuli kuna ni zeo, ni mwahala ma Hindu. Muka fumana mutu mwatereni, muipi wa kale ya sehisa bo sibuhabuhi, inge ba lobezi fa limapo ni libaka kaufela, fa gilasi. Kono kwa mulaho mwahali, kuna ni muuna ya lumela hande ku zeo. Usweli kueza zeo ka kuipa.

²³ Mi—mi lu fumana zeo mwa lika kaufela. Lu fumana bufitelezi bwa tumelo. Neba mutu wa mango uca hahulu kufiteleza. Kamba, kamba, sika kaufela!

²⁴ Kono haiba taba yateni itiswa hande mwa Mañolo, kipeto hakuna se si kona . . . Ni fumananga hahulu madokota babañata ba balumeli kufita mo Ni fumanelanga bakutazi ba balumeli. Kona mo ni fumanela. Luli ni fumani cwalo. Babañata ba lumela.

²⁵ Ni bile mwa lipuzo ku ba Mayo. Haiba kaufela mina mwa ziba cwalo, se li patalalizwe mwa mutende, ni libaka kaufela. Ni lipatela zende za madokota kai ni kai. Hakuna. Ba li lumela. Ni—Ni bile ni madokota baba ni telanga, inge mwa lipuzo mwani, bali, “Ha lu ipizi kuli lu bafolisi. Lu ipiza kuli lutusa fela pupo. Kuna ni fela mufolisi alimuñwi; yoo ki Mulimu.”

²⁶ Ki ba bakai baba balile fateni *Reader's Digest*, ka za Donny Morton yani, yene ba ñozi kuli, “na folisizwe”? Mi, “Makazo ya Donny Morton,” *Reader's Digest*. Ili, kuli, ni mwateni ne niliteni mwa lipuzo ni likalabo zani. Mushimani yomunyinyani yani na sa supilwe munwana ki ba Mayo, ba Hopkin, ni babañwi kaufela. Mi Mulena Jesu a mufolisa, a mueza hande.

²⁷ Mi Florence Nightingale, muikulu wa muikulu wa nyandi Florence Nightingale, London, England. Afufiswa kuzwa kwa Durban, South Africa.

²⁸ Mi taba yateni haisika patalazwa hande. Kuswana fela inge . . . sina linako zeñata mwa . . .

²⁹ Ni Bukreste ha bu si ka yemelwa hande kwa sicaba. Bukreste bu yemezwi kwa sicaba kuba fela mubulelelo wa tumelo ya kupanga. Bukreste ki Mutu yapila, Jesu Kreste, Mulimu ya zuhile, yapila mwahala luna cwale. Bukreste ki Mutu, isiñi tuto ya tumelo. “Ku Mu ziba ki Bupilo.” Mane isiñi neba kuziba Linzwi la Hae; boo ha kona Bupilo. “Kuziba Yena,” mi Yena ki yena Linzwi.

³⁰ Mulikani naize kuna, ha ki kale hahulu, ki hali . . . Ne ni sweli fela kuambola ka za . . . ze ne lu nahana ka Liñolo leliñwi mwa Bibele. Mulikani yo neli muituti yazwile mubano lulo. Ki hali, “Kihande, wena fela ha uzibi Bibebe ya hao.”

³¹ Se nili, “Ni ziba Muña yona hande luli.” Kacwalo, yeo kona nto yabutokwa, haiba Ni ka Mu ziba. Uka tokomela ze siyezi kateni. “Ku Mu ziba ki Bupilo.”

³² Mi, cwale, kamuso kakusasana, mwa tuyaho moo, kiyani, muuna ya ni yemela kwa sicaba, Dr. Lee Vayle, uteni mo. Haiba kuna ni lipuzo mwa munahano wa hao, taha, uka i alaba, aeze kaufela zakona kueza, ku kutusa. Dr. Vayle uteni mo. Ni lumela kuli uteni mo kwa mulaho mwa tuyaho cwale. Muituti yomunde hakalo, mi ki muuna ya lutilwe musebezi wateni luli. Kacwalo, haiba kuna ni yana ni puzo, kamba sika kaufela, mi kufita kulika fela kubuza cwale, mwa mukopano wa sicaba sina woo, kupalañi, mubone Dr. Vayle. Uka tabela kuambola sika kaufela se—se mutabela ku ikambota ni yena. Mi hape una ni

sebelezo kwanu, kakusasana. Mi lu ka tabela ku—ku kopana ni sicaba moo.

³³ Mi, kasamumulaho, la Sunda kakusasana kukaba sikolo sa la Sunda, mwahala muleneñi kaufela. Ha lu na—ha lu liki kunga la Sunda, la Sunda kakusasana kamba la Sunda musihali, mwa muyaho moo, kakuli haki—haki hande.

³⁴ Mwa bona, likeleke, musebezi wa—wa hao ki kwa—kwa keleke ya henu. Mi keleke haina ni lisebelezo, seo—seo si lukela kuba sibaka sa hao. Mi ha lulati ni yomukana kuzwela fande, hauna ni sibaka sa musebezi kwa kufumaneha. Haiba keleke ya henu ina ni ancafazo, mi lu ipumana kutaha mwa muleneñi mo musweli ancafazo, ha lu tabelangi kueza cwalo, batili kutokwa. Lutaha kwanu mwa kutwano ya Bakreste, kufana sibaka, ka pilu yende kwa sicaba kaufela, likeleke kaufela. Haluna ku . . .

³⁵ Ha ni wa siemba sa kopano ifi kaufela, ni yekana. Ha ni wa siemba sa kopano ifi kaufela. Na—Na ni Mukreste fela. Mi Na, susumezo ye Ni sweli, Ni lika fela kuitusisa yona kwa—kwa kukuteka Kreste, ni kutisa baezalibi kwa kubaka. Mi kona fela ze Ni ziba kueza. Kusepa, ka Lizazi lani, ni kusepa kuli Uka bulela kuli, “U kondisize ukonile.” Mi ao kona manzwi o Ni bata kubulela . . . ku Mu utwa ha abulela.

³⁶ Ni bile ni komokanga hañata. Ni ka tabela ku yo Mu utwa Ha yema ni kuotolola mazoho a Hae zazi lani, abulele kuli, “Mutahé ku Na, kaufela mina mukatezi ni kuimelwa.” Cwale, zeo neli za kale. Kono, “Ki hande, mutanga Ka yomunde mi ya sephahaha,” ikaba kwapili. Mi, Na, Ni pilela ku yo utwa zeo.

³⁷ Mi cwale, he, la Sunda musihali, lu ka lapelela bakuli. Fokuñwi sicaba si swanisisanga ku zeo kuba sebelezo ya foliso. Cwale, ha ki sebelezo ya foliso. Ki tapelo ya bakuli. Mwabona? Lu lapelelanga bakuli. Mi, hañata, kona fo ku ezahalelanga lika, ona ha lusweli kulapelela bakuli.

³⁸ Ni bata mukutazi kaufela, mwa na ha kaufela, kai ni kai kaufela, ya lumela, kuli atahe, mubone kuli mutahe la Sunda musihali, mu yeme ni luna hanze lu lapelela bakuli. Hakuna taba kamba kopano ya henu ki ifi, kamba seo ili yona kaufela, haluna taba ka zeo. Kaniti, una ni maikuto bakeñisa sicaba sa hao, mi haili sicaba ki sicaba sa Mulimu, ni batu ba ba bata kufoliswa.

³⁹ Muhupule, ha u kula, musebezi wa hao wapili ki kubona dokota wa hao ni kubona sa ka bulela. Mi cwale haiba uka fumana taba ya butuku bobuñwi bo—bo asakoni; sayansi, sayansi aisika kona ku mu patululela tuso kaufela ya hao, kipeto una ni tukelo ya kutaha ku Mulimu. Ki yena Ñaka yomutuna. Mi cwale . . .

⁴⁰ Ni kulapela, ni kuba ni tapelo ye lapelelwa wena. Ba eza cwalo, ba lukela kueza cwalo, mwa keleke kaufela ya Bakreste. Mwendi baezanga cwalo kwanu. Ha ni zibi. Kono kwa libaka zeñata, Bakreste ba lapelelanga bakuli ba bona. Ba Presbyterian

ni babañata ba bona bana ni likundi zetuna za foliso kwa mutulo kaufela, ni libaka zeshutana za naha, kulapelela bakuli, mi ba kondisa hande luli; Presbyterian, Lutheran, Methodist, buñata bwa bona.

⁴¹ Ancafazo yabona yetuna ne ikalile ka mikopano ya lifoliso. Mi kacwalo bazwa kuzona, eeni sha. Sikwata sesinca sa taha mwateri, bona, buñata bwa bona ba taha hamoho ni ku I shandaula mo ba batela, mi kipeto kuzwa yeñwi ku Yona, mwabona, kukutela hape kwa tuto ya tumelo yani, sina Bafarisi ni Basaduki ba nako ya Mulena Jesu.

⁴² Kono cwale, mukutazi kaufela u memilwe, la Sunda musihali, kuli atahe abe ni na, ni—ni kunitusa hanze lu lapelela bakuli. Mutise bakuli ba mina ni baba zielehile.

⁴³ Cwale, lu lika cwale ku lukulula sicaba...kufumana baezalibi ba ba sa zibi Mulena luna, baba sa zibi kuli Ha si ka shwa. Wa pila. Yena, Yena ha si ka shwa. Wa pila, ku ya kuile. Mi Na ize, “Kakuli Na pila, muka pila ni mina.” Ki sepiso yecwani, mi ki susuezo yecwani, ha lubona nako isutelela!

⁴⁴ Bakreste ba niti kaufela ba lumela kuli Kutaha kwa bubeli kwa Kreste ku sutelezi. Ku zamaela kai, ha lu zibi. Kana muboni Alaska haiba ni lizikinyeho za lifasi hape kacenu? Iliñwi ya zona, neli yebutuku sina yapili mo ne inezi, fela nei si ka nyunga hahulu mubu. Mwa ziba, Jesu na bulezi kuli lika zecwalo zeo li ka ezahala Kutaha kwa Hae ku si ka ezahala fela kale.

⁴⁵ Mi, muhupule, lika ze mubona zesweli kuezahala faa, Linzwi ne li bulezi kale kuli likaba teni faa, ka kuswana fela sina mwa Na sepiselize za zikinyeho ya lifasi. Kacwalo, hamoho, kiñi ha lu sa beyi lipilu zaluna hamoho, ni ku li tamahanya mwa Linzwi la Mulimu, ni ku lumela ka lipilu za luna kaufela? Ku lukile.

⁴⁶ Cwale, maabani busihu, ne luli... Ne ni pamuzi tuto kaza Abrahama, ha to biza libizo la Mulena yana bonahalile ku yena kwani kwa sitabelo sa mwana hae, kwa na sweli kuya. Libizo neli kuli *Jehova-Jaire*, ili kutalusa kuli, “Mulena uka Iponela sitabelo.”

⁴⁷ Cwale, busihu boo, Ni na ni Mañolo alikani ni litaba ze lukisizwe, kamba zepeli, zeñozwi faa, ze Ni tabela kumi—kumi siyela. Cwale, lu si ka eza kale cwalo, ha lu lapeleni fela fa nako nyana, hape.

⁴⁸ Ndate, lu lapela kuli Unge Linzwi la Hao... “Linzwi la Hao kona Niti.” Mi Bibebe ibulela kuli, Jesu wa bulela, uli, “Linzwi ki Peu yana cezi mucali.” Cwale lu lemuha kuli haiba peu ki peu yende, ina ni mata a kumela. Mi haiba peu yeo i shimbilwe, mulelo wa yona mwa—mwa tato ya Mulimu, kipeto ika siya peu ye na ni mata a kumela. Mi cwale Jesu hanali fa lifasi, Nali yena Kota yani. Mi peu ya Na cezi neli Linzwi la Hae, mi lu ziba kuli Imeliswa fela ka Bupilo bwa Hae Tota.

⁴⁹ Mi lu ziba kuli peu, ha iwela mwa mubu o munde; isiñi fa macwe, kusina mibisi; kamba neba mwa miutwa ni liseto, zekona ku i pukutisa kapili; kono mwa tumelo yende, yefumile, ye nunile. Peu ifi kaufela ikatisa za mufuta wa yona.

⁵⁰ Mi lu ziba kuli peu ni peu, kamba sepiso ya Mulimu, ika tisa za mufuta wa yona, sene i sepisizwe, haiba i kopana ni mu-... mubu omunde, mubu o limilwe, o lukisizwe; kaufela ma—ma macwe ha sa nepezwi kwahule, ni mibisi, ni bumaswe, ni buitati, ni ku sa tokomela, ni sitoyo, kaufela ha se li kumulezwi kwahule; mubisi wa bumaswe wani omela mwahali, fokuñwi olika kusinya lika zalika kueza Mulimu. Lwa lapela, Mulimu, kuli zeo lisike zaba mwahala luna, kono ibe kuli Linzwi lelinde lifumane mubu omunde ku bona.

⁵¹ Halunze lu latelela mushemi yomutuna yo, Abrahama, mwa tuto ya busihu boo, lu fumane sibaka sa luna, ka kuziba kuli lu bana ba Abrahama, ka tumelo ku Kreste. Mi, he, lufe kanya kwa Libizo la Hao Tota ni likute, kakuli lu kupa ka Libizo la Jesu Kreste. Amen.

⁵² Lu ka kutela mwa mulaho nyana busihi boo, mwa tuto yene lu ambola ka yona maabani manzibwana. Yani neli, kuli, lu fumani Abrahama hakalisa, mwa kauhanyo ya 12 ya Genese. Luli, libizo la hae ne libulezwi mwa kauhanyo ya 11, ndatahe ha zwa kwa Babilona mi ba yaha mwa—mwa Ur mi yee... neli naha ya Makalade.

⁵³ Mi he lu fumana cwana, hape, kuli Mulimu na bizize Abrahama, ali fela muuna yasina libubo wa libizo la Abrame. Na sa bizwi Abrahama pili. Mi, ni Sarah, "Sarai," Sarah ne si Sarah pili. Kacwalo lu fumana kuli, *Sarai* ni *Sarah* neli zepeli zeshu... neli mabizo amabeli a shutani. Mi *Abrame* ni *Abrahama* neli mabizo amabeli ashutani.

⁵⁴ Cwale lu fumana kuli, mwa taba yee, ne lu mu shituzi maabani busihu, kuisa ha ku tiiswa, kuli Mulimu na mupakile ka ku tiisa bulikani, mwa Na ka boniseza ku Abrahama kuli Na ka buluka sepiso ya Hae. Zeo li fumaneha mwa kauhanyo ya 15 ya Genese yee. Foo ki kuli... Mi Abrahama na biziwe mwa manzibwana, kuli aye, abulaye nkowana kamba sitole, mi ni puli ya musali, ni totolo. Mi ne lu fitile ku zeo maabani busihu, mo ne libezi za sisali ni za lipoho. Mi cwale ni maiba amabeli, kamba nkwilimba ni liiba, ili fela lubasi lo lu swana; mi nelufimani zene yemelwa ki zeo, kuli zeo kamita ne li yemela foliso. Ze, mane ha li si ka cinca. Foliso kamita ibile ka tumelo. Kono tifo, eeni sha, ne i abilwe mwa bupilo bwa folofolo kutaha mwa bupilo mutu.

⁵⁵ Cwale, mwa Testamente ya Kale, mulapeli hana taha ni mali. Mulimu ukopananga fela ni mulapeli mwataswa Mali a suluhile, sibaka sinosi fela seo Akile aba ni sona kamba se akana abanga ni sona. Haana ku ku katanyeza mwa lituto za litumelo za hao.

Haana ku kutanyeza mwa tuto ya sikolo sa hao. Uka kopana ni wena mwatasa Mali; seo kona sibaka fela si nosi. Isilaele kaufela na lapela mwatasa mali.

⁵⁶ Mi lu fumana foo he, hape, kuli nelu fumani (sikamañi?) kukutela kwa litaba za kale za kuli, moo buitamo ne bu ezezwa ni sicaba, mi lu fumana mwa mifuta ya Kale ni mikwa yeshutana mo ne ba ezeza buitamo. Mi ni mo luezeza kacenu, ka kuswalana mwa mazoho, ni zeñwi cwalo, ni kubulela kuli, “Ku kwalilwe!” Mi ma Japanese ba nepelana lizwai ku yomuñwi ni yomuñwi, kueza buitamo.

⁵⁷ Mi—mi ka kuzamaya kupotoloha lifasi, mi mufumana buñata bwa lifasi lisali mwa buino bo buswana bo ne lili kubona mwa mazazi akale, sihulu mwa linako za Kale ni kwa Upa. Bibebe ya hao ikaba buka yenza usaya fela kwa Upa, hauna ku... kwa mulaho mwa Jerusalema, Palestine, kwa mulaho kwani. Uka... Bibebe, Iñozwi mwa... Luna lu ma English kwanu, mi lu batu ba Makuwa, lu lika ku utwisisa buka ya Sikuwa, kona kuli ki nto yetata. Haiba mu kutela kwani, mu ka fumana linyalo ni lika kaufela, ni ona cwalo fela mo ne ba ezeza mwa nako ya Kreste. Liká zeñata kwani ha li si ka cinca ni hanyinyani, mwa sizo sa bona ni linzila.

⁵⁸ Mi cwale luna, ku zéo, lufumana kuli ha ne ba eza buitamo boo mwa mazazi ani, neba—neba bu ñola fa kaemba ka litalo la ngu, kamba—kamba fa mukata. Mi kipeto ba bulaya folofolo, ni kuyema mwahala liemba. Ni ku ipuma, bo ki buitamo bwa bona, kamba mwa bubeli, manzwi a bona; ne ba i hoha mwa liemba zepeli, sina *cwalo*. [Muzwale Branham upazula pampili mwa liemba zepeli—Mu.] Mi ha litaha hamoho, zepeli *ze lina* ni kuswalana hande ka kuswa luli. Nelina ni ku kopana, siemba kwa siemba, kona kuli nekusina mukwa wa ku kopisa. Kacwalo he lu fumana cwana, kuli, mwa tuto yaluna ya maabani busihu, ne lufumani kuli Mulimu na pakile ku Abrahama buitamo bwa Hae.

⁵⁹ Cwale, Abrahama, sepiso ne ifilwe ku Abrahama ni Peu ya hae mwa mulaho wa hae. Isiñi Abrahama fela, kono ni Peu ya hae. Cwale, cwale, peu, peu ya nama ya Abrahama, neli Isaka; kono haili Peu ya moya ya Abrahama ya tumelo, neli Kreste. Isiñi ka Isaka, lifasi kaufela li ka fuyolwa; kono ka Kreste, yona Peu ya Silena, lifasi kaufela ne li fuyozwi, kakuli Na shwezi batu kamukana, linaha kaufela ni batu kaufela.

⁶⁰ Cwale lubona mwahali mo, hape, mwa buitamo boo, kuli Na bonisize mwani sa Na ka eza, moo Mulimu na ka pazulela Kreste Jesu. Mi mubili no zusizwe ni kubeiwa kwa lizoho la bulyo la Mulimu ni kwa Bulena bwa kwa Halimu, mi Moya wa Kreste wa tiswa mwa lifasi.

⁶¹ Cwale kambe luna ni nako, nemuka bona cwalo. Sika kaufela, neku leliñwi la Mañolo libulela kuli, La zamaelela

mwahala Bibebe kaufela. Haiba ha Li zamaeleti, kipeto kuna ni—kuna ni se si fosahalile. Za Kale neli fela muluti wa ze Nca, ono Li monyeha fela. Mi, haiba muba ni muluti, mwakona kubulela hande kuli ze Nca ki lifi. Kona kuli kona kwa Na fumaneha kwani, uteni mi ukaba cwalo.

⁶² Cwale Moya wa Kreste u kutezi fa Keleke, ka swanelo kutaleleza Joani 15 hape, mwa Na bulez kuli, “Ki na Kota, mina mu mitai.” Mi he hape, Joani 14:12, “Ya lumela ku Na, misebezi ye Ni eza uka i eza ni yena,” misebezi yeswana, nto yeswana. Kushetumuka cwalo mwahala Mañolo! “Ha muina ku Na, ni Manzwi Aka aina ku mina; mukupe se mu lakaza, mu ka si fiwa.” Lika zeñata zeo Kreste . . .

⁶³ “Fa nako nyana lifasi halina ku Ni bona. *Lifasi*,” leo ki linzwi la Sigerike *kosmos*, le litalusa *muezeso wa lifasi*, “halina ku Ni bona hape. Kono mina muka Ni bona, kakuli Niya,” *Niya* ki tulokandina twa mutu, “Ni kaba ni mina, mane mwahala mina, kuisa kwa mafelelezo a lifasi,” kueza Jesu Kreste yaswana maabani, kacenu, ni kuyakuile. Yena—Yena—Yena usiala ona cwalo. Na zuhile kwa bafu. “Lifasi, ya sa lumeli, haana ku Ni bona.” Habana ku Li lemuha. Kono mulumeli uka Mu lemuha, kakuli Yena ki Jesu yaswana yanali Yena ni kamita. Ha si ka cinca. “Waswana maabani, kacenu, ni kuyakuile!”

⁶⁴ Mi cwale, mi Linzwi leo, batu babañata balika ku Li eza inge kuli ha Li si ka susumezwa. Cwale, Ni bata kubulela taba yeñwi fa cwale, yetile fela mwa munahano waka.

⁶⁵ Mi Hani lumeli kuli katala ki sibaka sa lisheha. Se ha ki sibaka sa kuezeza lisheha. Se ki sibaka sa busepahalil. Mi sihulu halubona Lizazi la Mulena linze li atumela, lu swanelo kuba hahulu ka kusepahala cwalo.

⁶⁶ Kono nekuna ni—ni likande lene ni bulelezwii, nako yeñwi kwa kale, la—la mutangana yomuñwi yana . . . Kwani neli kwa Boston, mi aya kusili. Nana ni bomae babande, sapili, ka kukala likande, mi bomae ka niti ne ba ziba mushimani wa bona kuli nana ni pizo mwa bupilo bwa hae, ya kusebeleza Mulena. Mi sani nesika—nesika tusa me ufi kaufela, sina ni ku mutusa, me wa niti luli, kuziba kuli mwana hae wa mushimani . . . kuli Mulimu uba fuyozi ni mwana ya ka kutaza Evangeli. Yacwalo ulukela kuba sibyana se si bukwala mwa bupilo bwa mushemi wa musali kaufela. Mi kacwalo me wa mubotana yani, alika kueza kaufela za na kona, amu isa kwa sikolo, ni kwa sikolo sa bukutazi, ku yo amuhela BA ya—ya hae.

⁶⁷ Mi kacwalo hanali kwahule cwalo, bo mahe bakula habutuku. Mi yena cwale, sina Mukreste kaufela mwakona kuezeza, ba biza dokota. Mi dokota . . . Neba kula katabi maneku kaufela amabeli. Mi dokota alika kaufela za na kona ku muezeza, kuli—kuli atatube katabi, mi nekusina. Na mu file milyani ya—ya sulphur, penicillin, ni yeñwi cwalo, kuli—kuli ibulaye

kokwani, kono yatokwa ku mutusa. Bomahe batotobela maswe, ka tundamo. Kacwalo ba luma liñusa ku mwana, yanali kwa Asbury, Kentucky, kwa Wilmore College, ku to pot- . . . kutobona bomahe kakuli nebaka shwa. Mi cwale kakusasana habusa, mucaha hana itukisa kufunduka, ba amuhela telegiramu, “Bomaho se ba ikutwa hande kwateni. Libelela lu ka ku zibisa hande.”⁶⁸

⁶⁸ Mwendi kasamulaho wa silimo cwalo, musali muhulu aba ni kolo ya kubona mwana hae. A kutela kwa hae kwa pumulo ni nako ya sikolo ha se si pumuzi. Mi ki hali, “Ima, Ne ni utwile kuli ne mu folile,” kasamulaho bama no ba ni nako nyana ya milapelo, mi mwana ni bomahe bakona kuba cwalo. Ali, “Ne—Ne ni si ka utwisisa mulyani wa na cincize dokota, kuli ucince buino bwa—bwa mina kapili cwalo.”

⁶⁹ Mi bomahe bali, “Mwana ka, nesi—nesi zeo.” Se bali, “Wa ziba kokuna ni mukopano wani mwa mukwakwa kwanu, ona sicaba sani kafani . . .”

Ali, “Eeni, Na hupula zeo.”

⁷⁰ Bali, “Kuna ni kalibe yana utwile kuzamaiswa kutaha kwanu ku to ni kupa haiba mulisana na ka to ni lapelela. Mi Na bulelela kuli ku lukile.” Mi bali, “Mulisana ataha ni ku to bala mwa Bibele, ‘Haiba kuna ni ya kula mwahala, mina, abize babahulu, mi ba mu toze ka oli; ba mu lapelele. Tapelo ya tumelo i ka pilisa ya kula.’” Mi ali, “Wa ziba, na balile cwalo mwa Mañolo, mi ani lapelela ni ku ni toza ka oli. Mi—mi kakusasana habusa, Na ikutwa hande luli kuli mane dokota ani talima fela. Mwa mazazi fela akubala Ne ni folile hande.” Kihande, ki hali . . . Ali, “Oh, kulumbwe Mulena!” Bomahe bali, “Mwana ka, u swanela ku . . .”

⁷¹ Ki hali, “Ima, mukala kueza inge ona batu bani.” Ali, “Amutwe ima.” Ali, “Lu itutile kwa sikolo mwa na balile zeo, Liñolo la bubeli la na balile neli mwa Mareka 16, mo ibulela kuli, ‘Lisupo ze li ka ni baba lumela. Ba ka beya mazoho fa bakuli mi bao ba ka foliswa.’” Ali, “Lu itutile zeo kwa sikolo ki Mareka 16, kuzwa fa timana ya 9 kushetumuka, ha i si ka susumezwa.” Ali, “Mwa bona, batu bani ha ba si kaya kwa sikolo, buñata bwa bona kulo kwani. Ha ba si ka ituta, ki batu fela ba litimbi.” Sebalí, “Ba—ba nani lipilu zende, hakuna kukakanya.” Kono ali, “Lu itutile kwa sikolo kuli, kuzwa fa timana ya 9 kushetumuka, zeo ne li ekelizwe fela, mwedi ki ba Vatican kamba nto yeñwi, kono,” ali, “kakuli kuli sibaka seo ha si si ka susumezwa.”

⁷² Bomahe ba kalumuka hahulu bali, “Halleluya!” Mi kacwalo ba li . . .

Yena ali, “Ima! Kihande, kiñi ze mi bulelisa cwalo?”

⁷³ Bali, “Ne ni sweli fela kunahaha, mwana ka, mbali haiba Mulimu akona ku ni folisa ka Linzwi le li si ka susumezwa, ki sikamañi Sa kona kueza cwale ka le Li susumelizwe he?”

⁷⁴ Kacwalo—kacwalo zeo neli lisepiso zeñwi. “Mukupe sika kaufela ka Libizo la Ka, Ni ka si eza.” “Haiba mu bulela kwa lilundu leo kuli, ‘Shimbuluka,’ mi mu sa kakanyi mwa pilu ya mina, kono mulumela kuli se mu kupile si ka ezahala, mwakona kuba ni se mu kupile.” “Ha mu lapela, mu lumele kuli mu ka amuhela se mu kupa, mi si ka fiwa ku mina.” Mwabona, kaufela Lona li susumelizwe, siemba sa lona kaufela.

⁷⁵ Linako zani Morris Reidhead, muituti yomunde, hana tile kwa lapa laka. A amuhela kolobezo ya Moya o Kenile; awela fa tafule yenyinyani ya kunwela kofi mwa ndu. Ki hali ku na, ali, “Muzwale Branham, Ni utwisisa kuli noli mu—... U wa Baptist.”

⁷⁶ Mi se Nili, “Kihande, Ne ni beilwe fela fa bukutazi, kwa keleke ya Missiona Baptist, inge nili fela mushimani; Ha ni wa bona...”

⁷⁷ Ali, “Kihande, ki bafi Mapentekota bosweli kufumaneha ni bona baa?”

Se nili, “Ki batu fela inge wena ni Na.”

⁷⁸ Ki hali, “Kihande, teezeza,” ali, “kikuli u nahana kuli ki Moya o Kenile obanani?”

Se nili, “Luli.”

Ki hali, “Kizañi kaufela za kulaha ni kukibakiba ni kuhuwaka?”

⁷⁹ Se nili, “Kihande, ba lukela kuzwissa nakambuti kwa mulomo. Haiba ha ba itusisi yona hande, kipeto mawili aka pikuluha.” Se nili, “Wena usweli fela kuba—kuba luta zelite ni kaufela, kufita fela ku li kasha ona cwalo. Ipeye mwa musebezi, tumelo, ube mwa mukwakwa, kulika kutisa sicaba mwahali, ili mwa Mubuso wa Mulimu.”

⁸⁰ Mi yena ali, “Kihande, Ni ba boni haba eza zeo kaufela.” Ali, “Na kubulelela libaka ha Ni li kwanu.” Ali, “Mushimani yomunde yazwa kwa India,” naize, “na ipumanezi tuto ya hae ni sikolo.” Ali, “Na, ha Ne ni funduka, ku muisa kwa fulai, ku yo mu kwelisa fulai, ku mu sindeketa kwabuse bwa mawate, Se nili ku yena, Na li, ‘Mucaha, cwale una ni tuto ya hao, u kutele kwa sicaba sa henu...’” Ni sepa Na itutile kwa... Ha ni... Ni sepa ki za mapangapanga.

⁸¹ Ki hali cwale, ali, ha na kalile kuya, a li, “Kiñi ha u sa... hani mupolofita wa mucembele ya shwile yani, Mohammed, ni kuikungela Jesu Kreste ya zuhile wa niti mwa pilu ya hao?”

Mi ki hali, “Shangwe, Ni bata ku kubuza taba yeñwi.”

⁸² Cwale muhupule, zeo lizwa ku alimuñwi wa baituti babatuna ba likolo za Bibele, likolo za milao, mutangana yo neli alimuñwi wa baluti ba bona.

⁸³ Ki hali, “Ki sikamañi sakona ku ni ezeza Jesu wa hao kufita mupolofita waka sakona ni ezeza?”

⁸⁴ Ki hali, “Kihande,” ki hali, “Jesu waka wakona ku kufa Bupilo Bobusafeli.”

⁸⁵ Mi ali, “Mawi, Koran ni yona isepisa nto yeswana.” Koran ki Bibele ya Mohammedan, mwa ziba. Ali, “Ni yona isepisa lika zeswana.”

Ki hali, “Kihande,” ki hali, “ehe, Na . . .”

⁸⁶ Ali, “Wa ziba, Koran haisika sepisa sika. Mohammed hakuna sa sepisize konji—konji bupilo mwa mulaho wa lifu.” Ki hali, “Jesu na sepisize mina baluti, kuli, ‘Lisupo se li limakazo li ka latelela.’” Naize, “Kona za na bulezi Jesu.” Mi ki hali, “Lu libelela kubona zeo ha li ezahala, kubona mina baluti ba mu lieza.” Mu nahane cwalo!

⁸⁷ A li kuna, “Ona foo,” ki hali, “Na lemuha kuli Ne ni si ka katana mushimani yaitutile zazi li liliñwi. Mi Na ziba . . . Alimuñwi ya na ziba za na ambola.” Wakona ku li toloka hande. Kono yeo ki nzila yende mwa kuezeza lika, libelela sila aku tulele nako yeñwi ona cwalo mi hauna kuziba kwa kuya. Mwabona? Kacwalo ki hali, “Na lemuha kuli ne si muituti wa zazi li liliñwi.”

⁸⁸ Mi ki hali—ki hali, “Kihande, cwale talima fa. Jesu u zuhile kwa bafu.”

⁸⁹ Ki hali, “Kikuli U cwalo?” Ali, “Mubile ni myaha ye likiti zepeli za kupaka cwalo, kono mane kiniti kuli buñata bwa lifasi ha ba si ka Mu ziba. Cwale ki butata mañi bobuli ni mina sicaba?” Ki hali, “Alubone Mohammed azuhe kwa bafu, mi lifasi kaufela lika ziba mwahala lihola ze twenty-foo.” Mi yeo ki niti.

⁹⁰ Mwabona, bana ni mbongolo ye yemi kwa libita la hae. Ni i boni kwani. Ba cincanga balibelei babane kasamulaho wa lihola zene kaufela, ba kulubela kuli uka zuha, ni kacenu. Mwa mufuta wani, ukataha fa mbongolo yesweu, mwabona, ku to koma lifasi.

⁹¹ Mi kacwalo abulela kuli, “Ha—ha zuhe kwa bafu lubone, mi lifasi kaufela li ka ziba.”

⁹² Ki hali, “Kihande, Jesu na zuhile kwa bafu.” Ki hali, “Mupolofita wa mina usali mwa libita.”

Ki hali, “U ziba cwani kuli Na zuhile kwa bafu?”

Muluti ali, “U mwa pilu yaka.”

Ki hali, “Mohammed u mwa pilu yaka, nina, sha.”

Ki hali, “Kono Nina ni tabo ni kozo.”

⁹³ Ki hali, “Shangwe, bulapeli bwa Mohammedanism bwakona kutisa ngana maikuto a ngana yamwa toho sina Bukreste mo bukona kuezeza.” Mi ba cwalo. U lukela ku bautwa ha ba huwa ni ku kalumuka. Yeo ki niti. “Litisa fela zeo kuba ngana ya mwa toho inge Bukreste mo bukona kuezeza.” Ki hali, “Kihande, ki

sikamañi so talusa ha ubulezi kuli Jesu na ku sepisize lika ze kaufela?" Ali, "Ni sepa kuli utamahanya kwa Mareka 16?"

Ki hali, "Eeni, yeo ki iliñwi ya zona. Ha ki kaufela zona, kono ki iliñwi ya zona."

⁹⁴ "Jesu nabulezi, Manzwi a mafelelezo Na bulezi kwa Keleke ya Hae kuli, 'Muye mwa lifasi kaufela, mwabona, mi mukutaze Evangeli, mi lisupo ze likaya ni mulumeli.' Kufita lili? 'Lifasi kaufela; sibupiwa kaufela. Ha ba ka beya mazoho fa bakuli, ba ka foliswa.' Manzwi amafelelezo Na bulezi, kuya ka Mañolo a mina."

⁹⁵ Ki hali, "Kihande, mwa bona," ali, "zeo ki . . ." Ali, "Mwa bona, siemba seo ha si si ka susumezwa." Ali, "Na sa talusi cwalo. Sani ne si . . ."

⁹⁶ Ki hali, "Ha li si ka susumezwa?" Ali, "Ki Buka ya mañi yosweli kubala?" Ali, "Koran kaufela yona i susumelizwe." Hum! Ki kukomiwa kwa bufokoli bwa lituto za bulapeli, tuto ya bulapeli ya kuinahanelia fela haina—haina Moya wa kuyema ni kulibana ni taba yateni.

⁹⁷ Sina bana ba Siheberu mo ne ba bulelezi, "Mulimu wa luna wakona ku lu lamuhela kwa buhali bwa mulilo obuhali, konohe haluna ku kubamela siswaniso se." Lu tokwa sicaba sesina ni ciseho. Mutu ya lumezi ku Mulimu una ni bundume mi ulumela mwa lka zeipitezi. Mutu ya lumela ku Mulimu!

⁹⁸ Bo. Reidhead bali, "Ni lahile mwa mubu, Muzwale Branham, kulaha mubu *cwalo*, mi Na palelwa ku mu alaba." Ki hali, "Ni itamile mwa pilu yaka ku to kubona kasamulaho wa foo, ku to kubuza kuli zeo kaufela neli zañi." Mi ali, "Ki Na yo fa." Ki hali, "Haiba Moya o Kenile . . ."

⁹⁹ Ali, "Muzwale Branham, boma ne ba ni kenyize sikolo." Mi ali, "Na, Ha ni feza lituto zaka za BA, Na hupula kuli kuna ni hande . . ."

Na li, "Na ziba zo talusa."

¹⁰⁰ Ali, "Zazi le Ni amuhela BA yaka, Na nahana kuli Ni katani Kreste ona fani. Na si yo ha Ni amuhela Digri yaka ya Dokota mwa lituto." Ali, "Nina ni madigri amañata, madigri eni filwe, a kumateha mamota a hao, mi ukai Kreste u ona kaufela?"

¹⁰¹ Se nili, "Kina mañi kuli Ni bulele kuli baluti ba fosa? Kono zeo ha ki zona ze luambola. Ki Mutu, Kreste, yo swanelia ku ziba."

¹⁰² Cwale muuna yani una ni mikopano ya likutazo kai ni kai. Mi Dokota Lee Vayle fani, mulikana ka yomunde, ki mulikana hae, hape. Mi u sweli kukondisa hande, ulapelela bakuli ni kuba ni mikopano yeituna ni lika kaufela. Ki bakeñisa kuli muuna yani na lumezi.

¹⁰³ Cwale, mwabona, Moya onoli ku Kreste, mubili, Jesu yanali Mulimu, Emanuele. Moya o Kenile, Mulimu, natile ku Kreste, mi A ezwa “Mulimu yapila ni luna.” Mi cwale Na li . . . Zeo neli ku lu liulula; Mali a Hae na suluhile.

¹⁰⁴ Cwale, mwa Testamente ya Kale, mulapeli ha na taha kuto beya mazoho a hae fa sitabelo sa hae, mi upuma mumizo wa . . . ki muprisita yana ipuma mumizo, kamba kuitaleka sitabelo. Mulapeli na swala sitabelo ka mazoho a hae, ni kuutwa ku-ku kupazulwa kwa litalo, ni ngunyana inge ishwa; boyo bwa ngunyana inge butapiswa ka mali a yona, kwa mazoho a mulumeli, ni zeñwi cwalo, inge i swelwi mwa mulala, kuli icisiwe fa aletare yani. Mulumeli na lemuha kuli na lukela kuba yena yana ka shwela sibi sani, kono ngunyana ne i shwa mwa sibaka sa hae. Cwale, kono bupilo bone buli mwa mali, nebusa kuteli ku mulapeli, kakuli neli mali a folofolo, yesina moyo. Kono mwa . . . Kabakaleo nekuna ni kupuzo ya sibi, ka tundamo.

¹⁰⁵ Kono, cwale, Jesu ka kuba Emanuele, kipeto Bupilo bwa Mulimu nebula ku Yena, mi kona bo bu kuta; ha ki Bupilo fela bwa mutu, kono bwa Mulimu yena Kasibili, mwa mufut wa Moya o Kenile, bukutela ni ku mieza kuba bana ba bashimani ni basizana ba Mulimu. Kipeto mu bana ba bashimani ni basizana. Mi cwale ha u utwa kupazulwa, ni manyando ni koto yana fitile ku yona Jesu, ha i shubulwa, bulumiwa bwa Hae ha bu bizwa kuli musebezi wa diabolosi, “Baalezebubi,” ni ku shubulwa, ni ku somiwa, ki baeteleli ba bulapeli, ni kuhanawa. “U tile ku ba Hae Tota; Ba Hae tota haba si ka Mu amuhela.” Ni lika Za fitile ku zona! Mi ni kufa bupilo bwa Hae fa sifapahano, ku to liulula za na zibile kale Mulimu. Kuliulula; ku li kutisa kwa sibaka kone li—li wile. Mi, Mulimu aeza cwalo kuli alume Moya o Kenile kutaha mwa Keleke cwale, kuli U . . . sicaba, balumeli. Ki za balumeli feela.

¹⁰⁶ Ha ki za baba sa lumeli. Bona habana ku li bona. Ba shwile, ka kukala.

¹⁰⁷ Mutualime Bafarisi bani haba bona Jesu inge abonisa sona sisupo sa Bumesia sani.

¹⁰⁸ Amutalime Pitrosi, na lumezi cwale. Mi Natanaele na li lumela cwale. Musali kwa siliba na li lumeli; Bartimeasi wa sobofu. Kaufela bao bene ba si amuhezi, ne ba si lumela.

¹⁰⁹ Kono baeteleli bali ba yema fani ni kubulela kuli, “Ki Baalezebubi, ki moyo o maswe, mufuta omuñwi wa kalembeshwa kamba lisheha.”

¹¹⁰ Jesu ali, “Mu bulele cwalo ku Ni lwanisa, Ni ka mi swalela,” sitabelo ne si si ka fiwa kale, “kono cwale Moya o Kenile ha so tile ku to eza lika zeswana, linzwi li liliñwi la ku U lwanisa halina kuswalelwaa mwa lifasi mo kamba lifasi lelitaha.”

¹¹¹ Kiñi ha ne ba sa lumeli? Jesu naize “Mina mu ba ndata mina diabolosi, ni misebezi ya hae mu ka ieza.” Yeo ki niti.

¹¹² Kulumela Linzwi, ki ku amuhela Linzwi ni ku Li lumeleza kuba Bupilo. Cwale, Mulimu ubonisa fo mwa Na ka pakela buitamo. Kuna ni kuba ona cwalo. Keleke! Isiñi katengo, isiñi kopano; kono mutu ni Mulimu bana ni kuba Moya oswana. Woo kona mulelo wa Mulimu, kwa simuluho.

¹¹³ Adama ni Eva neli moya o swana. Bibebe ibulezi mwa Genese, mwa 1:27, “Mwa sibupeho sa Mulimu . . .” Mulimu ki Moya. “Mi Amu eza ka sibupeho sa Mulimu; muuna ni musali Aba bupa cwalo,” mwa buino bwa moya bonebuli yena Mulimu. Mi Adama na lukela kubabalela na—na naha, inge fela Moya o Kenile mo lukela kuzamaiseza Keleke cwale. Mi, ibo, mutu nasiyo mwa nama, mi nali zepeli cwalo muuna mi hape nali musali, kakuli ki moya o swana.

¹¹⁴ Mi Mulimu aeza mutu wa liluli la lifasi, ni ku mueza ka mufuta wa folofolo. Mane, cwale se luli folofolo, lwa ziba. Luna—kuna lwa futumala mali. Mi yeo ki folofolo ye futumala mali, mi lu mwa sibupeho sa bupilo bwa folofolo.

¹¹⁵ Mi cwale Mulimu anga likupo ku Adama, isiñi li . . . Musali ki sibyana se singilwe ku ze bupilwe za muuna, isiñi luli se si zwile kwa pupo ya makalelo. Anga likupo. A kauhanya za nama, ni kuzwisa moya wa sisali ku Adama aubeya ku Eva. Kwaba muuna ni musali.

¹¹⁶ Mi ba ha zwa mwa libaka zani, ba ba kwande a buino bwabona bo buswanelia. Kuna ni zelyangani kokuñwi. Mi musali habata muuna, kamba mu—kamba mu—mu muuna habata kueza za sisali, kuna ni se si fosahalile kokuñwi. Ba zwile mwa sibaka sa bona se si lukela.

¹¹⁷ Lwa lemuha cwalo ku Rebekah ni—ni Isaka, kakuba bahabo ka mali, mwabona, kono cwale sani ne si swanisisa kwa peu ya Isilaele ya nama. Kono, ka tumelo, Kreste ataha, isi mwa nama cwale.

¹¹⁸ Inge mo ne kuinezi zibahazo, ya mali fa sikwalo a munyako, mwa Egepita. Hakuna taba kamba nali yakeni mupato, kamba nebana ni buitamo bo bucwani, zibahazo neina ni ku boniswa kusi cwalo buitamo ne bu feliswa. Kiniti. “Ha Ni bona mali, Ni ka mi fitelela.”

¹¹⁹ Cwale zibahazo ha ki Mali; ki Bupilo bone buli mwa Mali, ili Moya o Kenile. Mi zeo ki . . . Ha nina taba kamba uwa bulapeli cwani; haiba ha u si ka amuhela Moya o Kenile, uka shwa. Yeo kona nzila fela inosi. Hakuna Mañolo asili akueza sika kaufela, konji ona yeo fela. “Musike mwa halifisa Moya o Kenile wa Mulimu ili mu swailwe ka ona kuisa lizazi la kuliululwa kwa mina,” Maefese 4:30.

¹²⁰ Mulemuhe cwale, lwa kuta, mi seo sibonisa kuli Adama ni Eva neli alimuñwi, ka kukala. Muuna ni musala hae ba lukela kuba alimuñwi ni kacenu.

¹²¹ Cwale, kono ba kauhana, kanti, mwa nama, neli fani Eva ha wa. Kuwa! Kiñi? Ku sa lumela Linzwi, kalulo ifi kaufela ya Lona. Batu babañwi bakona kunga siemba fela sa Linzwi, kono isiñi zesiyezi. Kaufela zona lina ni kuba mwateri. Mwabona? Mwabona? Na kakanyize fela silisiñwi sa Lona. Mi haiba butuku bo kaufela ni matata elunani atile kaufela ka musali alimuñwi ya na kakanyize kalulo ya Teni, lu ka kutisa cwani sika kaufela kwanda kulumela kaufela Lona, ni ku li amuhela kaufela Lona? Sani neli sa bona... Ne ba tiisizwe ka Linzwi lani. Ha ba to kauhana, mwa nama, ba wa. Musali awa, ka Linzwi. Musali... Mutualime, ki sikamañi sa bata?

¹²² Kuna ni batu babañata hahulu kacenu, babata zende, mukwa o ipitezi, nzila yebunolo. Habalati kutalimela nto iliñi ye tomilwe fapila bona. Haba ka eza cwalo, ba ka lelekwa mwa katengo ka bona, ku kashezwa kwande, kushubulwa.

¹²³ Kana hamuzibi, kuli, "Batu kaufela ba kabulela bumaswe ka mina, kumi tama litaba, ka bakala Ka. Mutabe mi mu nyakalale, kakuli mupuzo wa mina ki omutuna mwa Lihalimu, kakuli ki mo ba nyandiselize ni bapolofita bane balitenu ku mina pili. Mi kaufela babapila ka bulapeli ku Kreste Jesu ba ka nyandiswa."

¹²⁴ Cwale ki skamañi hape se lubata kuli Abulele? Manzwi amañata ñata likitikiti neluka abulela, Mañolo, ayemela zeo, na ka tumuka kuzwa kwa Genese kuya kwa Sinulo.

¹²⁵ Kuli kaufela ze lunani kacenu, likalezi mwa Genese. Ki yona kauhanyo ya kucala. Kusa lumela kaufela ni lika zeñwi ne likalezi ona kwale. Keleke neikale ona kwani. Liki kaufela ne li kalezi ona kwani. Kuswana sina likota zepeli zehula, mi ye ilikanyisa yeñwi, ni kuhula ka kuswana mane.

¹²⁶ Inge Moabi hape ni Mushe. Kwa taha Isilaele, yomunyinyani, asina kopano, asina naha ni yekana. Mi nebana ni sitabelo sesiswana mo mwa Moabi; kopano yende, baituti ba bona kaufela bazwile ku bona, batisa sitabelo se si swana. Kulika ku... Bishopu wabona fahalimu fani, Baalami, ataha ku to kuta sa na fuyozi Mulimu. Ba hupula kuli, "Batu ba bakwenuheli baa! Mane habana neba keleke yeba paka, mo ne ikabela. Ki bayambaeli fela."

¹²⁷ Mi ki Hali, "Kono ba palelwa ku utwa muhuwo wa Mulena wani mwa mafulo. A palelwa kubona foliso ya Bumulimu yani haikena mwateri, ka noha yani. Ni Licwe le li natilwe, ku bafa bupilo! Muhuwo wa Mulena mwa mafulo!"

¹²⁸ A palelwa kubona Cwalo, yena bishopu wa sibofu yani. Kono niteñi, kuya ka swanelo, nali fela ya kondisa hande sina Mushe mwa na inezi; tutala to tusebene, litabelo ze sebene, neba kutaleka totolo, kubulela za kutaha kwa Kreste.

¹²⁹ Kono Mulimu hatokwi kuli mutu a Mu tolokele litaba. Yena Uitolokelanga ili Yena. U eza sepiso, mi Wa itisa, mi iba toloko ya yona. Hakuna ya lukela ku itoloka. Mulimu hakupi ni yomukana.

“Bibele haina toloko ya kwa mukunda.” Mutu kaufela ulika kubulela kuli Ibulela *se, sani*. Mutuhelange Mulimu aipulelele ili Yena. Ki Yena yaeza lika. Na file sepiso; Wa yema mwa mulaho wa yona. Wa eza cwalo, kwa balumeli.

¹³⁰ Kono baba salumeli hakuna ze ba amuhela. Ha ki za bona. Ba shwile, ka kukala. Bona mane ne ba si ka yemelwa. Hakuna sika ku bona. Ki libyana ze shwile. Ha mu lukeli kuba cwalo.

“A mu tale Moya!”

¹³¹ Mulemuhe, A kauhanya Eva ni Adama, mi musali awa. Adama aya ni yena. Cwale, “Adama a si ka pumiwa.” Eva ki yena yana pumilwe. Kono Adama, Adama ya pili, neli mwana Mulimu hape. Mi ki awa bakeñisa lilato la kulata Eva, kulika ku mu kutisa, kakuli na mu lata.

¹³² Kreste aeza nto yeswana, ku to Mu liulula. Kumuisa kai? Kwa Linzwi. Kiñi ze ne tisize kuwa? Linzwi, ku sa lumela Linzwi, Linzwi kaufela lona. Mi Kreste utezi kuli Ato ba alimuñwi wa luna, Bupilo bwa Hae ku luna, kuli azwisesepili Linzwi. “Kwa simuluhu nekuna ni Linzwi, mi Linzwi nali ku Mulimu, mi Linzwi neli Mulimu. Mi Linzwi aezwa nama mi ato yaha ku luna. Yaswana maabani, kacenu ni kuyakuile.” Mulimu yaswana! Kona za Na tezi, kueza ona cwalo.

¹³³ Cwale lu fumana cwana, mwa tiisezo, u lu liuluzi kukuta ku Yena, aliulula bana bene ba yambaela bene ba ikasanea mwa mandu a kubatisa litupu; mi ba kutela kwa Linzwi hape, kukutela kwa Linzwi le li zibahalizwe!

¹³⁴ Mi cwale Majuda bani, Jesu ha natile, neba bulela kuli, “Luna ni Linzwi. Luna ni Linzwi. *Kize za na bulezi Mushe. Luna lu balutiwa ba Mushe.*” Jesu, ali wa myaha fela ye twelufu ya kupepwa, inza kanana ni bona. Mi cwale hani... Mwabona, kona mutu za ezanga ku Lona.

¹³⁵ Kono Jesu naize, “Ha Ni sa ezi misebezi Ya Ndate, kipeto musike mwa Ni lumela. Kakuli, misebezi ya Ni file Ndate kuli nieze, ipaka Yo ni li Yena.”

¹³⁶ Mañi? Mutu kaufela ya lumilwe ki Mulimu, Mulimu upaka misebezi Ya lukiselizwe kueza. Haiba ha ki cwalo, Mañolo ha paki cwalo, mu lituhele fela.

¹³⁷ Neba mwa Testamente ya Kale, nebana ni nzila ya kuziba lika kamba neli niti kamba kutokwa. Neba baisa kwani, muloli, kamba—kamba muboni, kamba ibe mañi kaufela, neba muissa kwa Urimu Tummimu. Lani neli Liseli la buipiteli.

¹³⁸ Mulimu kamita u ipitezi, ubeleka mwa buipiteli. Haibile fela kuna ni Mulimu kulo, kuna ni za buipiteli, haiba ki Jehova Mulimu.

¹³⁹ Mi, cwale, hakuna taba kamba tolo i utwahala bunde cwani, haiba ne i sa monyehi fa Urimu Tummimu, kipeto neli ya buhata.

¹⁴⁰ Cwale buprisita bwa kale bwa Aruni bu felisizwe, kono lu sa na ni Urimu Tummimu. Ye ki sinulo ya Jesu Kreste, ya Mu patulula mwa Linzwi. Mi sika kaufela se si shutana ni Linzwi la Mulimu; kushutana ni Lona. Kono Mulimu u ipulelela ka za Hae. U itibahaza ili Yena ka Linzwi la Hae.

Foo kona Jesu fa na komezi Satani. “Ku ñozwi . . .”

¹⁴¹ Mi ki yo hape Satani akuta, mi akena mwateni hape. A li, “Eeni, ku ñozwi hape . . .” Kono nako yani, ha taha, a nata fa—fa malaiti abuhali hahulu. Nako yani a cisa mafufa a hae. Atula kuzwa fani, kapili.

¹⁴² Ki hali, “Ku ñozwi kuli, ‘Mutu haana kupila ka buhobe feela, kono ka Linzwi kaufela le li zwelela mwa mulomo wa Mulimu.’ Zwa ku Na, Satani!” Mwabona?

¹⁴³ Mulemuhe sene si ezahalile. Mulimu kamita abile Aitibahaza ka sepiso ya Linzwi la Hae. Cwale kambe Bafarisi bani neb aka itemuna, Mushe naize, “Mulena Mulimu wa mina uka mi zuseza Mupolofita yaswana ni na.” Zeo neli mwa Mañolo.

¹⁴⁴ Kono ki kabakaleo Jesu ha na lumbile Ndate, ali, “Na itumela ku Wena, Ndate, U patezi litaba Ze kwa meto aba ba butali ni ba ngana, u Li patululezi kwa limbututu zekona kuituta.”

¹⁴⁵ Mi ha Na bulezi ku Pitrosi zazi leliñwi, ha ba yo taha. Ha Na bulela kuli, “Batu bali ki Na mañi na nili Mwana mutu?”

¹⁴⁶ “Alimuñwi wa bona ali ki Wena, ‘Elia,’ mi yomuñwi ali ki Wena ‘Mushe,’ ni zeñwi cwalo.”

Ki hali, “Kono yeo ha ki yona puzo. Ye ni mi buzize.”

Ali, “Ki wena Kreste, Mwana Mulimu ya pila.”

¹⁴⁷ Ki hali, “Ufuyozwi wena Simoni, mwana Jonasi, nama ni mali ha li si ka ku patululela zeo. Ha u si ka ituta zona mwa sikolo sa bulapeli, hakuna ya kulutile zona, kono ki sinulo.” Oh, mawi! “Fahalimwa licwe le Ni ka yaha Keleke ya Ka, mi minyako ya lihele haiba ku I koma,” ki sinulo, kamba kuzibahazwa kwa Jesu Kreste.

Na ize, “Ha Ni sa ezi misebezi Ya Ndate, mu si Ni lumeli.”

¹⁴⁸ Cwale ha lu zweleñi pili. Lu Mu fumana . . . Cwale ha luteñi mwa kauhanyo ya 17. Lu Mu fumana mo mwa kauhanyo ya 17, mwa Na bonahalile ku Abrahama kasamulaho wa tiisezo ye, kubonisa sa Na ka eza.

¹⁴⁹ Mi cwale, muhupule, Moya utaha fahalimwa . . . Mi Moya o li mwa Keleke, ili Keleke ya niti, Keleke ya luli, Keleke ya Mulimu, sicaba sa Mulimu; Moya oli ku sona, uteni fa, kona Moya oswana oli ku Kreste, ni sepiso, “Misebezi ye Ni eza mu ka i eza ni mina.”

¹⁵⁰ Muhupule, nako yeñwi kwa kukokotelwa, ku sika ezahala fela kale, ba Mu tama lisila kwa meto, ni ku Mu nata kwa toho, ni litaka, bali, “Cwale haiba U Mwana Mulimu wena, ki . . . U—

U mupolofita, kona mo ba ni bulelala. Polofita, mupolofita!” Ba fitisa kota, “Lu bulelele ya Ku natile.” Mwabona diabulosi yani? Mwabona?

¹⁵¹ Ki hali, “Ni utwisisa kuli U muezi wa limakazo yomutuna. Fetula macwe a abe buhobe. Ni bata ku Kubona ha ueza. Nika—Nika—Ni ka Ku lumela ha U ka eza cwalo, fetula macwe a abe buhobe. Ni ka lumela. Ni ka eza cwalo.”

¹⁵² Mutu akile ani bulelala ha ki kale hahulu, naize, “Haiba ukona kutisa mutu alimuñwi ya folisizwe, ni pampili ye ñozwi ki dokota!”

¹⁵³ Se nili, “Oh, makeke, muuna, kuza. Bakeñisa bunde!” Se nili, “Ni ka tisa madokota ka mianda anda.”

Ki hali, “Nina ni ma dollar aeza sikitaku libelezi, haiba ueza cwalo.”

¹⁵⁴ Ni se Ni tisa madokota, ni mapampili. Ki hali, “Kihande, masheleni ainzi mwa . . .”

¹⁵⁵ Se nili, “Ni bata masheleni ao kuba nubu ya kuhasanya bulumiwa.” Mi ki hali . . . “Luma mutu ya lumela mwa Evangelii, kwabuse bwa mawate.”

¹⁵⁶ Ki hali, “Kihande, halubone ninge musizana, mi na ni mizwale yahesu lu ka yema bukaufi, mi lu ka puma lizoho la hae, mi kipeto u lifolise ona fa fapila luna, mi lu ka ku lumela.”

¹⁵⁷ Se nili, “U tokwa foliso ya mwa booko.” Yeo luli ki niti. Muuna wateni na taselizwe hahulu ki diabulosi!

¹⁵⁸ Yena yaswana naize, “Haiba u Mwana Mulimu Wena, haiba ki Wena, tuluka fa sifapahano.” Oh, kanti Bibebe ha ne ibulela kuli Na pahekilwe fa sifapahano!

¹⁵⁹ Keyafasi ali, “U pilisize babañwi; Yena haakoni ku Ipilisa.” A sa zibi kuli, ao neli manzwi amatuna hahulu ku akile abulelwaka Yena. Kambe Na ka ipilisa ili Yena, Nasike kupilisa babañwi. Nana ni kuipa ili Yena.

¹⁶⁰ Luli, Na zibile yana Mu natile, kono Ha utweli diabulosi ka lisheha. Mulimu haana wa lisomo la hae. Haana lisomo ni diabulosi. Misebezi ya hae ilumelwa kuba ba lumela, ha ki ya kusomiwa ka lisheha.

¹⁶¹ Mulemuhe, Na iponahalize fa inge ana ni myaha ye nainte naini ya kupepwa, mi A bonahala ku yena ka libizo la Mulimu Yamata kaufela. Libizo leo foo, mwa Siheberu, ki *El Shaddai*.

¹⁶² Cwale, Mulimu una ni likalulo ze sebene, za mabizo a puluso. Lwa ziba cwalo. Mi hamukoni ku a kauhanya ku Kreste. Hamukoni ku a kauhanya. Kreste u kwanile ku ona kaufela, mabizo a pulusi ao. Mwa lumela cwalo? [Kopano ili, “Amen.”—Mu.] Yena, kikuli mu lumela kuli ki Yena Jehova-Jaire, “sitabelo sa iponezi Mulena”? [“Amen.”] Cwale kucwani he ka *Jehova-Rafa*, “Mulena ya folisa matuku a hao kaufela”?

[“Amen.”] Mi haiba zeo ne li sa zamaeleti ni Kreste, kona kuli Na si yena Jehova-Jaire. Kacwalo hamukoni ku likauhanya, taba yateni kaufela itamahani hamoho, mi kifohe cwale. Hakoni kuba Jehova-Rafa kusina kuba Jehova-Jaire, mane Hakoni kuba Jehova-Jaire kusina Jehova-Rafa. “Sa na holofalezi ki libi za luna, ka miupa ya Hae lu folisizwe.” Hakuna kukanana ka Seo.

¹⁶³ Cwale lufumana fa, U bonahala mwa libizo la El *Shaddai*, “yena Yamata kaufela.” Ya . . . Luli, linzwi, linzwi la Siheberu shad, *s-h-a-d*, babañwi ba libulelanga kuli “shade.” *Shad* litalusa “lizwele,” inge lizwele la musali. Mi A bonahala ku yena ka libizo la El Shaddai, le li toloka mwa buñata kuli, *mazwele*. “Kina Mulimu wa Mazwele. Abrahama, myaha ye nainte-naini ya kupepwa, zamaya fapila Ka! U petahale, ulumele Linzwi la Ka! Zwelapili fela kulumela! Ni sepisize, ka myaha ye sebente-faifi; ki ye taba yateni, seli-seli myaha ye twenty-foo cwale kuzwa fo Ni ku fela sepiso.” Mi ha ki—ha ki susumezo ni yeo mo ne ilukela kubela ku muuna muhulu yani, wa myaha ye nainte-naini ya kupepwa. Mi mata a hae kaufela na felile, mi fa Mulimu ayema fapila hae, ali, “Kina El Shaddai. Kina Mulimu wa Mazwele.” Amen. “Anya mata a hao ku Na. Kina mata a hao.”

¹⁶⁴ Sina, sina Testamente ye Nca ni ya Kale, Mulimu wa Mazwele. “Kina Mulimu wa Mazwele, anya mata a hao ku Na.”

¹⁶⁵ Sina mbututu yomunyinyani hakula, ya fokola; ya kula, ya fokozi, uyendamena fa lizwele la mahe ni kuanya mata a hae kuzwa ku mahe. Ka manzwi amañwi, “Abrahama, hakuna soli sona kwanda kuba fela mbututu ku Na.” Wa myaha ye nainte-naini ya kupepwa, hakusikaba kale nako, mwa bupilo bwa hae.

¹⁶⁶ Muhupule fela, Jesu na kokotezwi, sina maabani. Myaha ye sikiti mwa lifasi mwa—lifasi, ki lizazi fela li liliñwi ku Mulimu. Mwabona, inge fela mwa Na kokotezwi maabani.

¹⁶⁷ Mi mulemuhe, “Kina El Shaddai. U mbututu, yomunyinyani fela. Kono yendamena fa sifuba sa Ka, sepiyo ya Ka, mi uanye ku Na mata a hao. Kina mubupi ya lepelela mwahala lihalimu ni lifasi, ya beile linaleli mwahalimu. Kana kuna ni nto yetuna ku Mulimu? Kina El Shaddai, mi wena u mwana Ke. Ni ha uli ya fokola, mi Ni ku lumeleza kuba cwalo kuli lubone so kaeza ka zona. Ni ka bonisa mutala kwa sicaba kasamulaho nyana, kuli mutu alumele Linzwi la Ka. Ni ka yema ka Lona. Hakuna taba se si ezahala, kufita kai, Ni ka eza cwalo. Ni ka yema ka Lona. El Shaddai! Anya mata a hao ku Na.”

Oh, mu li, “Kambe Ne ni ka lumela . . .”

¹⁶⁸ U sa li El Shaddai. U sa li Mulimu wa Mazwele, Testamente ye Nca ni ya Kale. Anya fela mata a hao ku Lona, oh, kaufela zo tokwa. Mbututu, haana ya mutusa, una ni kuanya mata a hae ku bomahé; yeo kona fela nzila inosi yakona kufumana mata a hae. Yeo kona nzila fela inosi mulumeli akona kuipumanela mata

a hae, ki ku anga kwa Linzwi la Mulimu. Ao kona mata a hae, lisepiso za Mulimu ku yena. Kuyema ni ku Li lumela!

¹⁶⁹ Mi haki kuli mbututu yomunyinyani fa yo uswaniswa fela ha kula, ha fokola, bomahe bakona ku mubeya kwa—kwa mazwele a bona, mi uya kwa kuanya mata a hae; uka kuliswa hasweli kuanya.

¹⁷⁰ Cwalo kona mokuinezi ni ku mwana Mulimu wa niti. Hakuna taba kamba munyefuli ubulela sikamañi, kaufela sa lumela. Haiba luli wa Li lumela, Jesu hakoni kupuma. U kulisizwe kuli Li patuluzwi ku wena. U na ni sepiso, mi hakuna se si ka i paleliswa. “Fahalimwa licwe le Ni ka yaha fateni Keleke ya Ka,” mwabona, la moyo, Niti ye patuluzwi ka Linzwi.

¹⁷¹ Halinze lu libelela, kutiyela mwa tumelo ya mina, munge sepiso ya Mulimu. “Na Ku lumela, Mulena. U sepisize ku ni fa kolobezo ya Moya. Ni yendamena ku za Hao...mwa tumelo. Tumelo yaka ye Ni na ni ku Wena, Ni anya kwa libyana zaka, kwa bufumu bwaka, kuzwa—kuzwa...kwa buiketo bwaka, kwa bufumu bwa Hao, bwa Linzwi.

¹⁷² “Mutu haana kupila ka buhobe feela, kono kuzwa mwa sifuba sa Mulimu ki mo aka anya mata a hae.” Linzwi kaufela le lizwelela mwa mulomo wa Mulimu, lika amuhela mata a hae Halizwa mwa—mwa mulomo wa Mulimu, ki Linzwi.

¹⁷³ Inge Abrahama, Abrahama na ipumulela. Cwale na sa pilile ni Sarah kuzwa hanali fela mu—mu musizana yomunyinyani. Neli kezela hae neku leliñwi, mi napila ni yena mane na mu munyezi. Mi, yena, nana ni... Na li mumba. Na sina bana. Mi ki yo fa cwale, sa li kale...haiba yena ki nainte-...nainte-naini. Musali ki eite-naini, eite-naini mwaya ya kupepwa. “Kono, Abrahama, pumula mwa tumelo ya Linzwi la Ka. Ni ka ku sepisa, Ni ka lieza. Kina El Shaddai. Kina Mulimu wa Mazwele kwa bana ba Ka ba balumela.” Haiba haulati ku anya, kihande, kipeto usike wa bilaela ka zona, wa bona. Kono haiba u mwana, usweli wa anya, kupumula, sepiso ifi kaufela!

¹⁷⁴ Mulemuhe, tumelo ya niti i itingile fa licwe le li tiile la sepiso ya Linzwi la Mulimu. Ha i shimbuluki. Tumelo ya niti i tiile hande.

¹⁷⁵ Kuswana inge naleli ya kwa mutulo, naleli yakwa mutulo ki kota ya lifwekelo la sandaula kaufela, masupeza nzila amu supeza kwa naleli fela ya kwa mutulo. Mi Mulimu, yena Linzwi, kona naleli ya kwa mutulo ya Mukreste kaufela, haiba u lateha, Moya o Kenile kona o ka ku supeza ku Yona. Haina kusupa kwa sika sifi kaufela. Tutengo tusili kaufel, ni zeñwi cwalo, ni—ni Bukreste bo bukopani ku zona, kamba ibe sikamañi kaufela; kuswana sina lifasi, le li shimbuluka, la cinca linaleli zani, kono halikoni kucinca naleli yakwa mutulo yani. Mane hakuna se si kona kucinca Linzwi la Mulimu. Muswale ku Lona, mupile ni Lona!

¹⁷⁶ Cwale, tumelo ya niti ha i shenyi ka lituto za litumelo ni lituto za ikupulezi mutu, ni ku sa lumela. I ka pila fela hande ni Linzwi, tumelo ya niti ni Linzwi.

¹⁷⁷ Mi ukona kubeya kai tumelo ya hao fa sika sisili fela haisi fa Linzwi? Haiba Mulimu na si bulezi, toma munwana wa hao fa Teni, Ki yona niti. Ha li shenyi. Lizwa mwa Buka ya Mulimu wa mazwele, yona Bibele, milelo Ya—Ya hae, sa Na sepe size. Sa Na sepe size, kona Linzwi la Hae. Linzwi li itahisa ili Lona. Lina ni kuba muhupulo lisika baka kale Linzwi, mi libe Linzwi; kipeto Linzwi la iponahaza, mi foo kona fo muzusa mata a—a mina. Kulumela! Kulumela! Kakuli Mubupi... Kulumela, sina mwa Na inezi, Mubupi ya ezize lifasi.

¹⁷⁸ Testamente ye Nca iize, kwa mulaho kwanu kuli, “Sina Mushe mwa na pahekezi noha mwa lihalupa, kona ni yena Mwana mutu mwa swanela kupahelwa.” Mulelo oswana. Neli sikamañi? Neba kakanya Mulimu, mi matuku ni matata aba kenela. Mi apaheka noha. Kuipahekela sikamañi? Kwa foliso yabona ni kwa swalelo ya bona. Kona mo ne libezi cwalo. Mi sipi iyemela katulo ya Mulimu; mi Jesu neli yona noha ye atuzwi yani, eeni sha, mushobo wa sipi.

¹⁷⁹ Cwale, amano paka buitamo, kamba buitamo ha se bu bonahalizwe kuyena, sifa tumelo kwa bana ba niti ba Mulimu. Linzwi lifa tumelo, Yana ni Mazwele. Li—li eza nto yeñwi kubona haiba li—li Linzwi, kamba buitamo ha se bu bonahalizwe, bufa tumelo kwa bana ba niti ba Mulimu.

¹⁸⁰ Cwale lwa ziba, lu lemuha kuli, mwahali mo, Na bizwa Elohim. Linzwi hape, mwa toloko mo, litalusa “Elohim.” Ni li talimile hande, kuli ni ikolwisise. Elohim! Mi *Elohim* ki yena “Yamata Kaufela.” Ki yena El Shaddai, Elohim, Mulimu wa Mazwele, Yena Yamata kaufela. Hakuna sa tokwa ku mutu ufi kaufela. Ki yena kutiya ni mata a hao kaufela.

¹⁸¹ Mulemuhe, zeswana li sa pakilwe fa, Ne ni lemuha musihali woo ha Ne ni sweli kubala, mwa Jobo, Jobo. U bizwa “Elohim.” Mi Jobo na sehiwa, a somiwa; kuli, ha ki siswaniso ni seo kacenu. Kono Jobo na ipumela mwa sepiso ya Elohim, “Neba kuli likokwani li ka sinya mubili woo, kono ona mwa mubili mo Ni ka bona Mulimu, yo Ni ka iponela ilina.” Kupumula ku Elohim, hakuna taba ka ze taha.

¹⁸² Musala hae ataha, ali, “U bonahala kuziyeleha, Jobo.” Mi se kutaha baombaombi ku yena, “Oh, wabona se si ezahalile ku wena, mushimani tuwe? Ne ni ku bulelela kuli ufosize, nako ye kaufela. Mwabona se si ezahalile?” Batu babañata luli batababelanga ku tameleza batu babañwi ze cwalo.

¹⁸³ Jobo neli muuna yomunde hahulu mwa lizazi la hae. Muuna yomunde luli wa Mulimu ku bene baliteni mwa lifasi neli Jobo. Abulelela Satani ali, “Hakuna ya swana ni yena.” Amen. “Kikuli u mu lemuhibile?”

¹⁸⁴ Satani ali, “Eehe, lika kaufela limuezahalela ka bunolo. Wisa lukwakwa lwani mi uni lumeleze ni muswale. Ni ka mueza kuli a Ku lwahe inzo Mu talimile.” U ezize kaufela za kona, kono na palezwi.

Jobo apumula mwa sepiso yeo.

¹⁸⁵ Mitangana ba taha, mi bali, “Cwale, cwale ukai yena Mulimu yo bulelanga za hae? Uh-huh, talima, u—u Mu lumela kuba se, talima—talima zesweli kuezahala cwale.”

¹⁸⁶ Kono na sa pumula ku El Shaddai, kamba neba limbongola za hae lika mu sinya bupilo bwa hae nebuswana fela inge kuli bufelile. Na inzi fa libunda la mufuse, inza iñwaya ka siñetana.

Musala hae ali, “Wena . . . Kiñi ha u sa lwahi fela Mulimu ni kushwa?”

Ali, “U bulela inge musali wa sikuba.” Oh, mawi!

¹⁸⁷ “Mulena ufile, mi Mulena u ngile, ku fuyolwe Libizo la Mulena. Ni sepile ku Elohim. Ni Ha ka sinya mubili woo, likokwani za mubili li u ce, kono ona mwa mubili waka wo Ni ka bona Mulimu, yo Ni ka iponela ili na; meeto aka aka mubona mi isi usili.” Ataha cwalo, mwa Mateu 27, mi babakenile ha ba zuha, a zuha ni kuzamaya, kono luli . . . ni kukena mwa munzi. Ki mufuta luli wa kacenu, ibo ni kulibeleta, kusepa mwa sepiso.

¹⁸⁸ Mulemuhe ha Na bonahalile ka Libizo le, ili Libizo la Mulimu Yamata kaufela.

¹⁸⁹ Cwale, keleke, cwale lwakona kuba ni tuto nyana fela, yekona ku mi lyanganisa nyana. Haiba ha mu lumeli, foo kuingile ku mina. Ki luna ba mo, Ni ka bulela fela ze Ni nahana. Una ni tukelo ya kunahana kaufela zo nahana.

¹⁹⁰ Kono, mulemuhe, kono lika ze kaufela neli “mifuta, miluti, ni mitala,” sina Bibele ha i bulezi kuli nebali cwalo. Ki zeo kaufela. Mi seo ki kuli, Mulimu utalimana ni Abrahamama mwa musipili, inge fela mwa Na ezelize ni Peu ya silena ya Abrahamama mwa musipili. Mulemuhe, Utalimana ni Majuda ka nzila yeswana. Kaufela ne li kalezi kwani, mwa sepiso yani ya buitamo; linaha kaufela, batu kaufela.

¹⁹¹ Mulemuhe kasamulaho wa kubonahala mwa Libizo le la Mulimu Yamata kaufela. Mi za patululwa ku yena kuli Na li Yena Yamata kaufela. Nasina batusi; Nasina za na tokwa, muñoli ufi kaufela. Nali fela anosi, Mulimu. Na li Mulimu, anosi. Mi ki Ha bonahala ku Abrahamama ka Libizo le, mi Hana ti lo bonahala ku yena ka Libizo le, mi Abrahamama a Mu lemoha yoo nali Yena, A cinca libizo la Abrahamama. Cwale utile kwa mutalelela wa kulumela cwale. Mwabona ko izwelezi Keleke? Ni sepa mwabala mwahala mibamba. Ataha fa sibaka fa Na ipatuluzi ku yena Yoo nali Yena, mi ki Ha cinca libizo la Abrahamama kuli sepiso italelezwe.

Cwale mu li, “Hakuna ze li mwa libizo.”

¹⁹² Cwale ki kabakalañi ha Na cincize libizo la Abrahama kuzwa ku Abrame kuba Abrahama? Kiñi ha Na cincize libizo la Jakobo kuzwa ku *Jakobo*, “kuluku,” kuba *Isilaele*, “nabi ni Mulimu”? Kiñi ha Na cincize libizo la Saule kuba Paulusi? Luli, libizo la hae, kaniti, luli lina ni se li talusa. Kaniti luli. Haiba hauna libizo lelinde, Mulimu uka li cinca, haiba U ku bizize. Eeni, sha.

¹⁹³ Mulemuhe, A cinca libizo la hae fa cwale, kuzwa ku Abrame kuba *Abrahama*, ili kutalusa kuli, “ndatahe macaba,” aekeza kwateni h-a-m, Abrahama. Kona kuli Na ezize cwalo kuli sepiso yetezi ikone kutalelela. Mi haili mwana cwale, ya na sepisizwe kale koo, akone kubonahala, kamba, ka manzwi asili, apatululwe, nako Ya cinca libizo la hae amano lemuha Yo nali Yena. Na kaba cwalo, na ka hopula kuli nekuna ni mukiti wa ona; kono a lemuha kuli Yani neli Elohim, Mulimu anosi. Kono, hana ezize cwalo, ki Ha cinca libizo la hae. Ki hali, “Cwale, Abrahama, ha u sa bizwa Abrame, kono *Abrahama*, kuba, ‘ndatahe macaba,’ Ni ku ezize cwalo.” Abrahama, cwale, uinzi mwa buino sakata cwale. U inzi mwa buino kuya ka sinulo ya Yoo nali Yena. Mi cwale u mwa buino bwa kubona mwana kuli abonahale.

¹⁹⁴ Mwana ufakaufi ni kutaha, kubonahala. Oh, bana ba Abrahama!

¹⁹⁵ Mulemuhe, Na cincize libizo la mulumiwa wa hae, kwa nako ya maungulo. Bukaufi fela, nana ni myaha ye nainte-naini, ne kusiyeki fela mwaha ulimuñwi, mi Acinca libizo la hae kuzwa ku Abrame kuba Abrahama. Kucinca libizo la hae, aekeza kwateni h-a-m, ili kutalusa kuli “ndate.” Na lukela kuba ndate, ndate wa sepiso; ndate, sepiso.

¹⁹⁶ Oh, haiba muna ni temuho ya moyo, muiteeleze! Kasamulaho wa kupatululwa kwa Libizo la Hae, la Yo nali Yena, A cinca libizo la hae. Cwale kasamulaho wa sinulo, cwale Ataha fa lifasi, “ha ki sikuwata sa Balimu; kuna ni Alimuñwi,” cwale seli nako ya sinulo kakuli Mwana ya sepisizwe kuli apatululwe kwa Peu ya silena ya Abrahama, ya sepiso.

¹⁹⁷ Amutalime, Na li cincize kuzwa ku Wesley, Baptist, Presbyterian, Pentekota. Hanizi kamba ni bulele zeo kamba nee. Ha mulukeli ku li lumela. Kono Ni sepa mu ka ni swalela, kakuli Hanilati ku mi utwisa bummaswe.

¹⁹⁸ Kono, amutalime, ha ku si kaba mulumiwa kwa likeleke za—za Mulimu, mwahala nako kaufela ya kale, yekile yaba ni muiteleli, kuzwa kwa makalelo a kuongaonga, yaswana sina muiteleli wa kacenu, Billy Graham, kulukile, kakuli uile mwa lifasi kaufela. Mwabona? Mi, mulemuhe, lwa li kuba lube ni muuna, muongaongi ufi kaufela... Lunge Sankey, Moody, Finney, Clavin, Knox, kamba abe mañi kaufela, Wesley, Luther, hakusikaba kale mutu ya fela ka litaku za h-a-m, nihaisali.

Mulumiwa fela yelukile lwaba ni yena mwa masika a likeleke, ya fela ka litaku za h-a-m; G-r-a-h-a-m, Graham.

¹⁹⁹ Mi Graham ki litaku ze silezi, mi silezi ki nombolo ya mutu, lizazi la mutu; mutu na bupilwe, mwa—mwa Genese 1:26, ka lizazi la bu silezi. Kono sebene ki nombolo ya Mulimu; lizazi la bu sebene, Mulimu apumula. Isiñi silezi, kubonisa kuli G-r-a-h-a-m yo ukaba kwa keleke ya mwa lifasi; kono, A-b-r-a-h-a-m, Abraham ki litaku ze sebene.

²⁰⁰ Uli, “Hakuna zeiputezi mwa linombolo.” Kona kuli ha uzibi lipalo za Bibele ya hao. Mwabona? Kipeto mu ka Li fosa cwale. Kiniti.

²⁰¹ Mulimu u “petehile” mwa *bulalu*, mi “ulapelwa” mwa *busebene*, ni “kulikiwa” mwa *mashumi amane*, mi “tukuluho ya jubile” kimwa *mashumi aketalizoho*, oh, kaufela so bata kueza. Lipalo kaufela, Bibele izamaya mwa lipalo.

²⁰² Mulemuhe, wabu silezi ki mulumiwa ya lumezwi kwa lifasi. Mi, mulemuhe, sebene ki nombolo ya Mulimu.

²⁰³ Mi mulemuhe ka nako ya kubonahala ye cwale, kamba kupatululwa kwa Mwana. Mi hane . . . Li ka patululwa, Mwana. Se ba zibile kale Libizo la Hae, bazibile Yo ali Yena. Ki yena El Shaddai, Yamata kaufela, Elohim. Kono cwale lushetumukela mwa nako ya sepiso ya Mwana kuli a Iponahaze. Mwana, Isaka yena Kasibili ya sepisizwe, u libelezi kutaha mwa sibaka.

²⁰⁴ Mi Na si kaea sika konji Aluma ni kucinca libizo la hae kuzwa ku Abrame kuba Abraham, kakuli, “nali ndatahe, macaba.” Mulemuhe, *-ham*, h-a-m, “ndate, ndatahe macaba.”

²⁰⁵ Mutualime yaba yeo mo izamaeleta hande ni Malaki 4, “Kukutiseza Tumelo, kwa bas hemi,” Peu ya Abraham ⁱ i kutisezwe kwa Tumelo ya mufuta wana nani Abraham, Peu ya hae ya silena. Malaki 4 kuli italelezwe, ki ku kutiseza Tumelo ye neli kwa mulaho kwani kwa simuluho, ku Ikutisa kwa Peu ya silena ya Abraham. Ki sepiso. Luli ki yona sepiso. Peu ya Silena ina ni ku patululwa, mi ka . . . ka Peu ya Silena, ili yona Peu ya Silena, ya Kreste. Kreste ki yena Peu ya Silena. Mi Peu ki Moya o Kenile oli mwa lipilu za sicaba se si lumela ku Mulimu, se si kumalezi Linzwi la Hae, ni Mulimu inza beleka mwahala bona, balwezi Liñusa leliswana. “Nako nyana lifasi halina ku Ni bona, kono mina mu ka Ni bona; Nikaba ni mina, mane ku mina. Mi misebezi ye Ni eza, muka i eza ni mina.” Mwabona, ku ipatulula mwa mazazi a maungulo moo, mo i lukela kutahela.

²⁰⁶ Cwale, mutualimele kauhanyo ya 18 cwale. Kasamulaho wa kucinca libizo, Mulimu abonahala, ku to Ipatulula mwa nama. Kasamulaho wa Libizo ku zibiwa, Yo ali Yena, Mulimu ubonahalanga mwa nama. Abraham, zazi leliñwi lelicisa, lisunda nyana fela kamba likweli Sodoma isika cisiwa kale ni Isaka ataha. Mi, mulemuhe, Abraham uikinezi fande mwatasa oke ya hae.

²⁰⁷ Mi Lota uinzi mwa Sodoma, mi basweli baikola minyaka ya lifasi. Ibo, ki Mulisana wa keleke Lota, hakulata nana ni puteho yelikani kwani. Kaufela za na ezize, Bibele ibulela kuli, “Bumaswe ni libi za—za nako yani ne li filikanya moyo wa hae o lukile.” Kacwalo na lukela kuba ni bo Lota ba bañata kacenu, kono na ziba kuli hakuna za na ka bulela ka zona. Kacwalo he mulemuhe, naliteni kwani.

²⁰⁸ Kono Abraham, Amano ipatulula ku yena, cwale, Elohim ki Yena yana ambola ku yena. Cwale u inzi mwataswa ya oke, mi fa kutaha baana ba balalu, bazamaya inge libupiwa za batu. Mutualimele mata a sinulo, a Yoo Mulimu nali yena, yeneli ku Abraham, sene i ezize ku yena. Kasamulaho libizo la hae li cinciya kuzwa ku Abrame kuba Abraham, abona Baana ba balalu inge bataha, mi aba biza babalalu cwalo ali, Alimuñwi, “Mulena ka.” Babalalu cwalo, kuba Alimuñwi. Hakuyo cwalo ni nombolo ya bu silezi, Lota; habona bababeli inge ba taha, ali, “malena ka.” Pono ya Abraham mi sinulo ya mu bonisa kuli Nali yena Elohim Yamata kaufela. Peu ya Hae i lukela kuamuhela zeswana.

²⁰⁹ Mulemuhe mwa Na ipatululezi ili Yena, mwa Na itibahalelize ili Yena, kamba na lukile kamba kutokwa. Mulemuhe, ku ya lumela wa niti, sisupo sa Na ezize. Kiñi sa Na ezize, kuli azibe kuli neli yena Elohim?

²¹⁰ Cwale, na ize, “Mulena ka.” Ki litaku zetuna M-u-l-e-n-a. Yaile kwa sikolo kaufela, wa ziba cwalo; muituti wa sikolo kaufela uziba kuli ki Elohim, Yena Yamata kaufela, Elohim.

Muuna ni ni bulelezi, nako yeñwi ali, “Ha u lumeli yani neli Mulimu?”

²¹¹ Se nili, “Luli na lumela. Abraham naize Neli Mulimu. A ambola ni Yena; u lukela kuziba cwalo.” Eehe.

²¹² “Oh,” ki hali, “u talusa kuli Mulimu nayemi fani inza ca nama ya namani, ni—ni kunwa mabisi a komu, ni kuca buhobe bwa mbonyi, kaufela mo u bata ku bu bizeza kwani?”

²¹³ Se nili, “Na ezize cwalo. Kiñi, wena ha uzibi fela Mulimu waluna.” Kihande, mawi, Yena nakaba fela... Kiñi, Na fitile fela...

²¹⁴ Lu bupilwe kwa likalulo ze sikisitini; petroliamu, liseli la kozimiki, ni potashi, ni kalsiamu, ni zeñwi cwalo, ki likalulo fela ze sikisitini. Ha li swala fela hamoho, ni ku bululela moyo ku zona, ni kuzamaya mwa lifasi. Ni tabile hahulu Ki Ndate ya cwalo. Kamba likokwani li ka sinya mubili woo, kono Uka ku biza. U sepisize kuli Uka eza cwalo. Ki yena Elohim. Añwata lizoho leliñwi lelitezi, mi ali, “Taha kwanu, Woodworm,” kamba seo nesili sona kaufela, Mangeloi, “mi lu shetumuke. Ha luyeni latalime fa Sodoma, lubone ze ezahala.”

²¹⁵ Mi Abrahama, kasamulaho wa sinulo, aibona mi aziba kuli nekuna ni Mulimu alimuñwi. Mi ha ibona, ni kubulela kuli, “Mulena ka, fapuhela kwanu, inafafasi, ni tapise mahutu a Hao.” Cwale, na si ka bulela kuli, “mulena . . .” Mi, amutalime, zeo li mwa—li mwa taku yetuna foo. Mañi ni mañi wa ziba. Nina ni toloko ya Emphatic Diaglott. Mwabona, ki taku yetuna M-u-l-e-n-a, “Mulena,” Elohim, Yena Yamata Kaufela. Ali, “Tuhela ni ku kele mezi nyana kuli Utape kwa mahutu, ni Kufe muñwato wa buhobe, mi Uka zwelapili mwa musipili wa Hao.”

²¹⁶ Ali, Na liyehela fa. Kihande ni akufe. Ni—Ni bata kufeleteza fa, mi Hani zibi fo Ni ka feleza. Mu ni swalele fela fa nako nyana, muka itiisa kana? [Kopano ili, “Amen.”—Mu.]

²¹⁷ Mulemuhe, Elohim, Yena Yamata Kaufela, Mulimu. Mi ki Hali . . . Mutualime sa Na ezize.

²¹⁸ Cwale, bababeli ba Bona ba funduka, ne basweli kutalimela kwa—kwa Sodoma.

²¹⁹ Mi Yena ali, “U nahana kuli Ni ka patela Abrahama kunutu ye?” Hakuna sa ezanga konji A si patululele kwa bapolofita ba Hae. Mwabona, Wa ba zibisanga zona. Mi Ki hali, “Ha ni na kupata litaba ze, kakubona kuli u—u fuyozwi ki Mulimu mi uka luwa lifasi kaufela, ni zeñwi kaufela. Peu ya hae ikaba cwalo, mane, ukaba ndatahe macaba amañata. Hanina ku mu patela zona. Ni ka mu zibisa zona.” Mi kacwalo ki Hali, akala ku mu patululela zona.

²²⁰ Mi Ki hali, “Abrahama,” isiñi Abrame. “Abrahama, ukai musala hao, S-a-r-a-h?” Kana Na zibile cwani zeo? Kihande, lizazi fela kwa mulaho nyana, nali Abrame, zazi li liliñwi kamba amabeli lisika fita kale zani. Mi nali Sarai, mi cwale seli Sarah. Mi yena muuna seli Abrahama. Ali, “Abrahama, ukai musala hao, Sarah?”

Abrahama ali, “U mwa tende, kwa mulaho wa Hao.”

²²¹ Ki hali, “Ni ka ku potela kuya ka nako ya bupilo. Mi mwana ya sepisizwe yoo, ulibezezi kutaha mwa ponahazo cwale. Ukaba ni yena.”

²²² Mi Sarah, mwahali anosi, aseha cwalo, ali, “Na nili mucembele, mi nibe ni munyaka ni mulena ka hape, mi yena sa supezi?” Nto yecwalo, kuli, kakuli musali nali—musali nali wa myaha ye nainte, mi muuna neli mwanda. “Mi kacwalo he Na kona kueza cwalo hape?”

²²³ Mi Lingeloi, mulumiwa, Mulimu mwa nama ya butu, lali, “Kiñi ha sehile?”

²²⁴ Yani neli tiisezo. Kiñi? Abonisa kuli sinulo ne i lukile. Kwa bonahala kuli sa na Mu bizize, Elohim, ne si lukile. Kakuli, Na li yena Linzwi. Mwani neli mwa . . . Mwa Maheberu, kauhanyo ya 4, timana ya 12, ili, “Linzwi la Mulimu li buhali kufita mukwale olozizwe kwa ni kwa, li lemuha mihupulo ni maikuto a mwa

pilu.” Mi cwale Abrahama abona cwalo, a ziba kuli na ka Mu biza kuli, “Elohim.” Elohim, Nali yena Linzwi, “Yaswana maabani, kacenu, ni kuyakuile.”

²²⁵ Mulemuhe fani Jesu, yona Peu ya silena ya Abrahama, ha taha mwa lifasi, Aipatulula ili Yena kwa peu ya nama ya Abrahama, mwa sisupo sesiswana. Mi ba Mu biza kuli, “Baalezebubi.” Za ba foufaza, baba sa lumeli, ku ba foufaza ni kubatiseza kunyefula, ni kuba lumela kwa lihele. Kono ne li file pono ya Kuyakuile kwa balumeli, bene ba lukiselizwe Bupilo Bobusafeli.

²²⁶ Mulemuhe, Jesu na sepisize kuli . . . mwa mazazi a maungulo, ku si ka ba kale kutaha kwa Mwana mutu, kuli Uka taha mi aipatulule ili Yena, mwa mazazi ao Mwana mutu ha sweli kupatululwa, yona Peu ya silena ya Abrahama ika bona sisupo sesiswana. Cwale a mulemuhe, ha Na bulezzi, cwalo—cwalo ki ku Muhalalehi Luka 17:28 ni 30, “Mi sina mo ne kuinezi mwa mazazi a Sodoma.” Cwale, ki Jesu ya na bulezzi zeo. Ha ki na ya li bulezzi. Yena . . . Hakina ya li bulezzi batili, ni bulela za Na bulezzi. Kono, Jesu nabulezi cwana, “Sina mo ne kuinezi mwa mazazi a Sodoma, kona mo ku ka bela ni kutaha, fa kutaha kwa Mwana mutu,” cwale mulemuhe, “mwa mazazi ao Mwana mutu ha patululwa, foo Mwana mutu hanza patululwa kwa Keleke ya Hae.”

²²⁷ Sina ku Abrahama. Na li Mulimu, Na tundamezi kutaha fasifi; attiseza buitamo, alemuha Yo nali Yena, mi libizo la hae la cinciwa. Mulemuhe, la cinciwa Asika fita kale fa lilundu, atalima mwaabuse bwa Sodoma, kale Mwana wa sepiiso asika taha pili.

²²⁸ Jesu na bulezzi kaza siswaniso sesiswana. Jesu nasweli kubala Bibele yeswana ye Ni bala ni yemubala ni mina. Haiba mubata kuziba sene sili sona, mukutele kwa mulaho mubone sene baeza mwa mazazi a Sodoma. Mulemuhe, haki zeñata hahulu mwa mazazi a Nuwe (Na bulezzi kaza kusaipuluka kwa bona, mo ne ba cela, kunwa, kunyalana, kunyalisa), kono mwa Sodoma.

²²⁹ Cwale kuna ni “hakuna mezi ni amakana,” Mulimu na sepisize cwalo ka sisupo sa nambwamutalati. U lu file sisupo. Yena kamita ufanga lisupo. Nambwamutalati . . . Yena kamita wa hupulanga lisupo za Hae. Nako kaufela una ni likute ku zona hala lilimo, hapalelwi kufa sisupo sa nambwamutalati sani. Yena kamita ufanga lisupo za Hae. Mulemuhe.

²³⁰ Mi mwa sisupo sani, Ha si ka sepisa kusinya lifasi “isiñi ka mezi,” kono U bulezzi kuli lika “tuka.” Mi mulemuhe Jesu fa uli, “Sina mo ne kuinezi mwa mazazi a Sodoma,” lifasi la Bamacaba ne li ka sinyiwa. Masodoma!

²³¹ Cwale mutualime fa buino bwa linaha. Mutualime fa buino bwa keleke, inge fela Lota. Mutualime zeli mwahala bona: ki mutu, G-r-a-h-a-m, ku ba omanya, ona batu ba litaba za naha bani, kwa keleke ya nama. Cwale ki kwa keleke ya moyo . . .

²³² Kuna ni likwata zetalu za batu nako kaufela. Bao ki, balumeli, baba salumeli, ni baba likanyisa kulumela. Bana ni bona mwa likwata kaufela. Haiba mu utwile butata bo Ni utwanga, mwakona kuziba kuli bateni ni mwahali mo busihu cwana. Kacwalo he, kacwalo, mina... ni zetalu kaufela. Mulemuhe, ki fohe cwale, kuna ni likwata zetalu zeo kai ni kai.

²³³ Cwale haiba mukabona kuli neilukela kuba nto yeswana ni fo Mwana mutu hana ka patululwa kwa Peu ya silena ya Abrahama, ka Kreste (Kreste ki yena Peu ya Silena), foo Haswelii kupatululwa mwa mazazi a maungulo. Cwale, kuya ka mayemo, lifasi lianzi hande kaswanelo, kakuli Mwana yana pazulezi kwa Upa ulikelela kwa Wiko. "Mi neli lizazi la mbundu," baeza tutengo, likopano, "kono kukaba Liseli mwa nako ya manzibwana," ku bulela mupolofita Jeremia. Cwale, mi mwa mazazi akuli Mwana yani, Lizwa kwa mulaho wa malu a kopano, kuto ipatulula ili Yena, Na bulezi kuli lifasi lika likela inge fela mo ne libezi mwa mazazi a Sodoma, mi Mwana mutu na ka ipatulula ili Yena hape kwa sicaba sa Hae. Mutualime mwa Na li patululezi kwa peu ya Isaka; mwa Ka lipatululela kwa Peu ya silena, Munyaliwa wa Silena, yena Muoli. Muoli ki Peu ya silena.

²³⁴ Sina Mulimu mwa zwiselize naha mwa naha, mwa Egepita, U sweli kutisa Keleke kuzwa mwa keleke, kamba Munyaliwa uzwa mwa keleke; Keleke izwa mwa keleke. Mi bo masiyaleti ba Peu ya musali, bao kona bene ba siyezi, "kokuna ni lililo ni sitongo ni likwecameno, kakuli nebasina Oli mwa lilambi za bona, Moya o Kenile," kaufela liyemezwi. Ki bao foo.

²³⁵ Sibaka si beilwe hande. Mi cwale mutualime fahalimwa lilundu. Cwale, Keleke, Abrahama; Lota; Masodoma. Lifasi; keleke; mu Ketwa. Keleke, Munyaliwa, uzwa mwa keleke. Lu inzi hande ka swanelo mwa libaka. Lifasi lianzi fela hande mwa buino bwa lona.

²³⁶ Kulyangana! Kaufela se li lyangani. Zeo ki kuli, Na mi bulelala, lika kaufela ki za mazwake. Zona...

²³⁷ Ha ni taha, ni boni sisupo sesituna, sesili, "Mbonyi ya mazwake." Kiñi, ha ki yende. Batili. Zeo li lukela kumi tulakisa mina ba baba sa lumeli mwa bulapeli. Fani Mulimu hana ize, "Peu kaufela itahise za mufuta wa yona." Mi mwakona kuzwakanisa mbonyi ni kuienza kuba mbonyi yebonahala hande, kono hamukoni ku i cala hape; haina bupilo ku yona.

²³⁸ Mi kona mo lu ezelize ni keleke. Lu li ezize lelinde, ni ku li kabisa ka bwanda bo bu benya bwa likopano, kono halina Bupilo ku lona. Halikoni kutahisa bupaki bwa Bibele hape. Mwabona? Halikoni kutahisa bupaki bwa zuho ya Kreste. Ki silikani sa mazwake.

²³⁹ Batu baba tina hande, bahola mali amañata, likopano zetuna, zefumile, la Lusika lwa Laodesia, eni sha. "Bufumu, hakuna zo tokwile; ha uzibi kuli u mwelwa, unyandile, u sibofu,

mi u mubotana, u mapunu, kono ha uzibi.” Kambe mutu wa ziba kuli u mapunu, nemuka mu bulelala. Kono haiba ha zibi, seo cwale ki sibaka se si maswe, ki makeke. Musike mwa sehanga batu, kono mubange ni makeke. Kucwani kambe ki wena mwa buino bo bucwalo? Kucwani kambe Linzwi ha li si ka patululwa ku wena, no ka eza sikamañi? Kiñi hape ze ne kaba butokwa, haiba meeto a hao nali bubofu kuli mane ba Liboni? Yeo ki pono yesabisa.

²⁴⁰ Mi ona cwalo fela, ka mayemo aswanela. Haukoni kusupa munwana fateni; fo liinzi foo, za Na bulezi fela kuli kona ze kanga sibaka. “Lisupo ze li ka ezahala mwa mazazi a maungulo.” Mubone fo ba inzi, ona cwalo fela.

²⁴¹ Cwale amutalime, kuzwakana. Mwa ziba, haiba ka sika kaufela Na...Kunga, inge kunga to—to—to—to tonki, ni kuizwakanisa ni mbongolo, ya muuna, nitaluse, mi muakaba ni sikamañi? Mukaba ni mule. Kono mule yeo haikoni kuipepa ili yona hape. Mwabona? Mulimu naize, “Peu kaufela itahise za mufura wa yona.” Cwale kushimbuluka kwa libupiwa kuzwa kai? Musebezi wa mina kasibili unyazize zo mubulela kuli mwa lumela. Mulimu naize, “Peu kaufela itahise za mufuta wa yona.” Haikoni kuitahia hape. Batili, batili. I felile.

²⁴² Mi Ni sepa kuli mule ki iliñwi ya—ya lika ze sialezi hahulu mwa butimbi ku ze Ni kile nabona fateni. Hamukoni kuiluta sika. Ika ina fela foo ni bizebe byebituna byebitelele bwani, mwa ziba, mi ika libelela kufitela muzuzu wa kushwa kuli i ku lahe, isika shwa kale. Mi ya . . .

²⁴³ Hamukoni ku iluta sika. Si ni hupulisa . . . Ika ina ona foo, mi mu yo ibulelala lika, si ni hupulisa batu babañwi, baba ipapata kuli ki balumeli kacenu. Bizebe byebituna byebitelele, yali kuina fani, mi, “Mazazi a limakazo afelile. Haw! Haw! Haw!” Ha izibi kuli izwa kai. Hakuna ze ibiza ka Zona. Nto fela ye i ziba ki tuto fela ya litumelo za keleke.

²⁴⁴ Kono ni mi bulelele cwana, Nina ni likute la ye pepilwe kusina mazwake. Mushimani, yakona ku mi bulelala mayemo a situndo sa yona. Ya kona ku mi bulelala ndata yona, kuli maa yona ki mañi, ni yoo kuku ayona ali yena wa musali, ni kuku wa muuna. Ina ni situndo sa yona hande.

²⁴⁵ Kona mo ba inezi ni Bakreste ba situndo sa bona hande, bakona ku toloka hande kukena mwa Buka ya Likezo ni kubona ko ba zwelela, Mukreste ya ziba hande simuluhoh ya hae, ya pepilwe ka Moya o swana, nto yeswana, uka eza ka mukwa o swana.

²⁴⁶ Ka banyandisi ba baswana; litonki ni limbongolo lifulanga hamoho. Yeo ki niti. Ki fo he cwale. Muna ni kuba ni zona, kupale kumane. Le ki lizazi la mazwake.

²⁴⁷ Ne ni boni kalulo mwa mutende waba *Reader's Digest*, ha ki kale hahulu, “Mutundamene kucisa basali nama ya mazwake ye

ni—ni lika zeo, habakoni kuba ni limbututu za bona. Ba cincize. Sebababakima kwa maheta, mi ba basisani mwa linoka.” Kiñi, kikuli, mwa ziba kuli mutu kamita u ipulaya ka zwelopili.

²⁴⁸ Mukutele ku Mulimu! Mulumele Mulimu. Mukutele kwa Peu ya makalelo. Mukute mi mu Li lumele. Mu balile ta... muna ni matepu, nitaluse, Ni sepa mu a utwile, kaza: *Peu Ya Makalelo*, ni *Kota Ya Munyaliwa*, ni litaba zeo, ili za niti. Mulena wa ziba cwalo.

²⁴⁹ Kuli mane lika zeo libulezwi kale, likweli ni likweli. Mina sicaba, se mubona mo, ki zenyinyani fela, zemubona zesweli kuezahala. Mubuze sicaba se sibanga teñi, mubuze haiba kuna ni nako folikile za palelwa. Kubulela ka batu, lizikinyeho za lifasi, lika ze ka ezahala. Moya o Kenile wa lu bulelala. Kana ki niti yeo? [Kopano ili, “Amen.”] Kuna ni mutu ya bile... Luli. Mi ni kwa sicaba se sishutana.

²⁵⁰ Inge Marilyn Monroe, koo mane asika shwa kale. Neba bulezzi kuli na i pulaile. Na si ka ipulaya. Na shwile ka butuku bwa pilu. Ki niti.

²⁵¹ Muuna yo, mulwani yoo. Maginot Line ya mwa Germany. Liki zeo kaufela, ki likitikiti fela za litaba zeo, kaufela za zamaeleta, ka nako kaufela. Haikoni kuba nto isili fela kono ka Moya o Kenile. Mwabona? Mwabona? Na li sepisize.

²⁵² Nafile lika ze sebene ka 1933, ze ka ezahala. Mi cwale yeñwi ni yeñwi yazona iezahalile kwanda lika zepeli fela, ka kupetahala, ona cwalo fela. Kuli mane neba Mueteleli wa naha Kennedy naka ngiwa. Liteni zeo kaufela mwa libuka zaka cwale, ne li bulezwi myaha ye mashumi amalalu ni zetalu kwamulaho, ki niti. Kuli mane Maginot Line neika yahiwa, myaha ye ilebene isika yahiwa kale. Kuli mane Hitler uka taha, ni—ni Fascism, ni—ni Nazism, mi kaufela zona litamahane mwa swalisan, mi swalisan ika sinya Bukatolika. Mi ika sinya, eeni, hakuna taba kamba baeza sikamañi. Mi za boniswa, abulela kuli kukaba Katengo ka Ecumenica, ni kuli likeleke kaufela lika taha hamoho mi libupe siswaniso sesi bizwa Nombolo ya Sibatana. Mwa libonanga mwa mikwakwa, mazazi acwale. Kaniti luli. Lina ni kuezahala, kakuli ha li si ka palelwa fateni.

²⁵³ Mutu kaufela yaziba cwalo, ufi kaufela, mupotolohe lifasi, ha li si ka palelwa fateni nihaiba nako iliñwi. Likweli ni lilimo kwa ka kuinatahela, za zamaeleta fela hande ka swanelo. Ki Mulimu mwahala mina, sicaba; Mulimu ku luna, ona Moya o Kenile. Mulemuhe, Jesu nabulezi kuli Peu ya silena ika zibahala ka nto yeswana, mo mwa Luka kauhanyo ya 17. “Oh, mukutele, Mawe mina muhasani, kuzwa mwa likopano zamina, muye haenu.”

²⁵⁴ Ufi wa luna kaufela wakona kulumela kuli Mulimu... Haiba u lumela ku Mulimu, uziba kuli Mulimu ufolisa matuku. Foo hakuna puzo. Kiñi, haiba ha u lumeli cwalo... Mwa ziba, neba

bulezi mwa mazazi ani kuli, "Jehova, lu ziba kuli Wakona kufolisa, kono Hakoni kupilisa." Cwale, "Wakona kupilisa, kono Hakoni kufolisa." Mwabona, ki diabulosi yaswana fela, taba yeswana. Yena ki zepeli cwalo Mupulusi ni mufolisi. Ki Jehova-Jaire ni Jehova-Rafa.

²⁵⁵ Oh, mukute! Muhupule, Na sepe size kalulo ye, ya lika kaufela ya lika kaufela mo liinezi cwale, ya ze ne ka ezahala. Na bulezi kuli lika ezahala, mi lina ni kuezahala.

²⁵⁶ Balikani, mu Ni swalele. Ni mi liyehisize cwale. Ha lu inamiseñi litoho za luna fa nako nyana, Ni ka ba . . . Ni ka feleleza taba ye, mwendi, kamuso busihu. Nina ni makepe mwendi asikisi a litaba zeñozwi faa. Muinamise litoho za mina fa nako nyana. Mube ka likute, mañi ni mañi.

²⁵⁷ Mwakona ku sa lumelelana ni na; muna ni tukelo ya zeo. Nina ni tukelo ya kubulela ze Ni nahana. Ni bile ni Mañolo. Cwale, hakuna taba kamba Ni ka bulela sikamañi, haiba Mulimu ha si yemeli, kipeto Urimu Tummimu haibelevi, kipeto si hanilwe. Hakuna taba kamba si utwahala cwani hande, ni kuli siutwahala kuba niti cwani, Urimu Tummimu ina ni ku si bonisa. Peu ina ni kutiswa kwa bupilo. Haiba ha itiswi, kipeto ne si cwalo.

²⁵⁸ Cwale, kwa foliso, Ni likile ku mi bulelela kuli ha Ni mu folisi. Kuna ni babañata babakona kuipiza kuli ki bafolisi. Kipeto kuna ni babañata ba—ba bahanyezi ba babiza batu kuli bafolisi, kuli, ba hanyeze fela. Lipilu zabona halisika luka ni Mulimu. Mwabona? Mañi ni mañi u ziba kuli hakuna mutu yakona kufolisa yomuñwi. Mulimu ki yena mufolisi wa matuku. Mulimu akubizeze lifu, mi wena ulapele mobatela kaufela lubone, ni sipayela si kufe lindonga kaufela za mezi zazi ni zazi, kanti uka shwa kusina likañi.

²⁵⁹ Haiba Ni pumeha lizoho busihu cwana, ni kuyema fa ni lizoho le li pumehile, hakuna mulyani mwa lifasi okona kufolisa lizoho laka. Haluna mulyani okona kufolisa. Hakuna mulyani okona kufolisa. Dokota ufi kaufela uka mi bulelela cwalo. Uli tapisa fela masila Mulimu hanza li folisa. Halikoni kubupa misifa. Haiba Ni pumeha lizoho, mi, "Oh," mu li, "eehe, Muzwale Branham, kuna ni mulyani okona kufolisa zeo." Ku lukile, Ni bataku u ziba.

²⁶⁰ Halubone ni mi bonise. Haiba Ni pumeha lizoho mi liwelafafasi fa, dokota wakona kutaha ni kuomisa mubili waka ni ku ni bonahalisa kuijeta ka myaha ye mashumi aketalizoho. Waluka lizoho laka, ni ku yo ni taha ndonga ya penicillin, zazi i zazi, mi mwa myaha ye mashumi aketalizoho kuzwa kacenu sitombo sani sika bonahala inge mone siinezi ha si pangahala. Haiba—haiba mulyani no pangezwi kufolisa sitombo sa kupazuliwa, kiñi ha u sa si folisangi? Mulyani ufi kaufela okona kufolisa sitombo kwa lizoho laka, wakona kufolisa kupazula fa sipula fa, neuka

folisa kupazuha kwa koti yaka. Haiba ukona kufolisa sitombo, uka folisa sitombo se si pazuzwi kaufela fo siinzi. "Kihande," mu li, "kiñi, mulyani no pangezwi batu." Cwale kiñi u sa folisi? "Kihande," mu li, "bupilo buzwile ku wena." Kona kuli kuna ni sesiñwi kwande a kufoliswa ka milyani.

²⁶¹ Ki bupilo, luli, mi bupilo ki Mulimu. Kaniti, ki cona. Ibo, babañwi ki baezalibi, ba lyangani ni bona, kono niteni mu mwa sibupeho sa Mulimu. Mi bupilo bo nani ki Mulimu ya kufile bona. Wa ziba cwalo; batili, kakuli Mulimu ki yena mufolisi. Bupilo ki mufolisi. Mwa lumela cwalo, mwabona. Niboni zeñata hahulu ha li ezwa!

²⁶² Cwale halu Mu amuheleñi fela, mina bo? Lusika eza kale cwalo, Ha ni zibi kuli mwahali mo ki babakai baba kolwa, lusika... Haiba mu baenyi mwahali mo, ha musikaba kale mo fateni, kuli mwa Mu lumela kuba Mwana Mulimu? Mi ka se, Liñusa la busihu boo, Linzwi fela linosi, Yena mane ha si ka eza sika kaufela, kuli mwa Li lumela, mi mubata kuli kuli ni mi hupule mwa tapelo, munanule lizoho la mina. Muka eza cwalo? Oh! Mulimu ami fuyole. Oh, mawi! Mazoho a mianda yemilalu kamba yemine. Mulimu ami fuyole.

²⁶³ "Tumelo itaha ka kuutwa, ni kuutwa Linzwi." Libaka le Ni bulelezi cwalo, Peu ika fumana sishemo ni Mulimu. Ni nahana cwale, mwa sibaka sa—sa kubiza fela mukoloko wa litapelo mo, Ni ka tabela fela kuli mulapele.

²⁶⁴ Haluboneñi ni mife Liñolo, pili. Ka se lueza, si lukela kuba ka Mañolo. Si lukela kuba ka Mañolo! Mulimu haana ku kuteka sika sisili fela. Mulimu hakoni kukuteka buhata; mwa ziba cwalo. Hamu—hamukoni kutamahanya zeo ku Yena. Hakuteki buhata. Yena ukuteka fela Linzwi la Hae. Kono U sepisize, kuli, "Linzwi la Ka halina kukuta kuna mukungulu. Li ka taleleza se Li lumezwi." Mi lubona Linzwi le li tomezwi lizazi le. Hakuna taba kamba ku sa lumela kutaha cwani mwa mafulo, Mulimu uka kuteka Linzwi la Hae Ha fumana tumelo ya ku Li kuteka ka yona.

²⁶⁵ Cwale fokuñwi mwa tuyaho, Ni bata kuli munge Liñolo. Maheberu kauhanyo ya 3, Na lumela ki yona. Bibele ibulezi, kuli, "Ki Muprisita Yomuhulu, onafa cwale, yakona kuswaliwa ka maikuto a matuku aluna."

²⁶⁶ Ni mina baba nanuzi lizoho la mina, Ni bata kuli, sebelezo isa fela feela mo, Ni bata kuli mutahe tuyeme kwanu ni ku to lapelelwa, kuamuhela Kreste kuba Mupulusi wa mina. Mu ye ku iliñwi ya likeleke zende ze kwanu. Hakuna taba kamba kikai, mutu ya kutaza Evangelii, amuye kuyena mu yo kupa kolobezo ya Bukreste. Mi mulisana uka mi zamaisa kuzwa foo kuya kwapili. Yoo ki muuna wa Mulimu. U bizizwe kuba muuna wa Mulimu, uka—uka kuzamaisa kuzwa foo kuya kwapili. Fela, kambe Ni pila mwa muleneñi woo, Ne ni kaba ku yeñwi ya likeleke kwanu.

Ne ni ka kena kubona, bona baba lumela Evangel. Ne ni kaba kubona. Kiniti, Ne ni ka itibahaza ni bona, kakuli zeo kona zemulukela kueza. Mi ona zeo kona zemulukela kueza.

²⁶⁷ Cwale, haiba Ki Muprisita Yomuhulu yakona kuswaliwa ka maikuto a matuku a luna, cwale Wa swana maabani, kacenu, ni kuyakuile, kabakaleo Una ni kuba ni kezo yeswana ni ya Na ezize maabani.

²⁶⁸ Cwale amutalime, musali nyana yana sweli sapalo sa Hae, nako yeñwi, mi Aitemuna mwa mulaho mi aziba sa na nani musali, mi amu bulelala za tumelo ya hae kuli imu pilisize. Mi musali lemuha, mwa mubili wa hae; musali nasika utwa butuku bufi kaufela kuli abonise cwalo. Na sa tokwi ku li bonisa.

²⁶⁹ Ha mu bonisi lika. Mu lumela fela ku Mulimu. Mwabona? Ha mu lukeli kuyakisisa Mulimu, nihanyinyani. Hamukoni ku mubonahalisa, kuli upilise bupilo bwa hao, kuna ni Mulimu, kuya fela kwande ni kubulela kuli, “Ha lubone ni Mubone.” Mwabona, ulukela ku Mu lumela.

²⁷⁰ Lilwaniso kaufela za Mulimu ki za moy. Lilato, tabo, tumelo, pilutelele, tibelelo, musa, mwabona, kaufela ki za moy. Lu talimela fa lika zemusa koni kubona ka meto a nama.

²⁷¹ Mi Kreste uteni mo busihu cwana. Na sepisize cwalo. “Kaufela kokuinzi bababeli kamba babalalu babakopani mwa Libizo la Ka, Ni mwateni mwahala bona. Ni Mwateni!” Ki “Na” hape, ki Yo fa. Cwale, “Wa swana maabani, kacenu, ni kuyakuile.”

²⁷² Mu lapele, ni kubulela kuli, “Mulena Jesu, Na kula,” kamba kaufela ze mu tokwile. “Ni—Ni tokwile, mi Ni—Ni bata Wena, Mulimu yomunde, ku ni utwela butuku, ni ku ni folisa ku ni bisa hande. Mi cwale haiba Nina ni tumelo yeñata, Mulena, ni Ku swale... Ni—Ni ziba kuli Muzwale Branham ha ni zibi. Ni muenyi. Mi Ni ziba kuli ha ni zibi. Cwale, haiba—haiba muuna yoo u ni bulelezi Niti, ye Ni lumela kuli ki yona, kakuli izwelezi kwa Linzwi la Hao. Ni I balile, Ni Iboni fela ka swanelo luli. Cwale aku Ipake. Ni bulela kuli kina Peu ya Abrahama, kuya ka Kreste, Ni ipulela kuba Peu ya silena, ni lumela ku Jesu Kreste, yena Peu ya Silena. Mi Ni lumela kuba siemba sa Munyaliwa wa Hae, Keleke ya Hae yeo Atahela. Mi Na kula mane ni tokwile. Shangwe, Mulena Jesu, lumeleza kuli ni swale sapalo sa Hao. Mi hak... mi hakupake kuna ka kubulela ku Muzwale Branham, sina Ha sepisize kuli kona mo ku kabela ‘sina mo ne kubezi mwa mazazi a Sodoma.’ Ni lumeleze fela... ni lumeleze fela kubulela ze Ni nahana ka, kulapelela, ze Ni bata, lika ze ni tokwile, nto yeñwi ka na.” Mu eze cwalo, mueze fela cwalo.

²⁷³ Ndate yakwa Lihalimu, cwale kaufela zona li mwa mazoho a Hao. Cwale ze kona ze Ni kona fela kueza, kamba mutu ufi kaufela, wakona fela kubulela Zo bulezi Fa, kuba Niti. Cwale

aku libonahalise, Mulena, ku ba Niti. Ni bulezi za Hao. Ni bulezi kuli Ni bulezi Niti. Ka Libizo la Jesu Kreste. Amen.

²⁷⁴ Ni bata kuli mu mu—mu lumele fela, mube ni fela ni tumelo. Cwale kusike kwaba ni ya ka zamaya zamaya. Muine fela ka likute luli. Ni bata kuli munahanisise ha ni yemi fapila mina, mwahali mo kokuñwi, Kreste, ya zusizwe kwa bafu; ataha mwa mamota nako yeñwi, aca sinkwa, mi ali, “Amu Ni swale, Ni nama ni masapo,” mi alikela fapila bona. Cwale Na—Na sepisize kuli Uka bonahala mwa mazazi a mafelelezo, mwa mufuta wa mubili wa nama hape, mwa nama ya mina, sina mwa Na ezelize mwa mazazi a Sodoma. Mulumu, yanali Kreste, abonahala mwa nama, cwale mwa Keleke ya Hae, Munyaliwa wa Hae. Mwabona, bataha hamoho. Ki nako ya kukopana. Likeleke za kopana, linaha za kopana, mi Munyaliwa ni Kreste basweli bakopana. Mwabona, ki nako ya kukopana.

²⁷⁵ Cwale mulumele fela, ka bunolo. Musike mwalika kuikalelwa ni kuikenya mwa sika, kakuli hakuna zemu amuhela. Fela—fela ka buikokobezo muli, “Mulena, Na lumela.” Yomuñwi aeze fela cwalo. Mi cwale Na . . .

²⁷⁶ Ki ba bakai babainzi fapila ka, sihulu . . . Cwale, Ni ziba kuli baana *ba*, ni baa *fa*. Ni ziba babañwi babaliteni *moo*. Kucwani mwahali *mo*, kwapata fela nina? Ha lu isezeni ngana fa sikuwata nyana se *fa* kokuñwi. Ki ba bakai baba si ka bona Kreste Haiponahaza ili yena sina cwalo, ka . . . Halu boneni mazoho amina, “Baba si ka bona kale fateni.” Ni sepa kuli mutu kaufela u si boni fateni. Ku lukile.

²⁷⁷ Amu lapele cwale. Cwale mube fela likute. Ha ni zibi Za ka eza. Hanikoni kubulela zeo. Ku itingile ku Yena. Kana li ka mi konisa kulumela, ka kutiya hande? Mulena wa liutwa zeo. U ziba linto kamukana.

²⁷⁸ Muuna yainzi fani, ukula mutuba. U lumela kuli Mulumu uka folisa mutuba woo nji? Wa lumela? Lu baenyi ku mañi ni mañi, Na sepa, wena ni Na. Ha ni ku zibi. Nali kuba ni kubone fateni. Kono haiba zeo kona zo no lapelela, nanula lizoho la hao. Haiba yeo ki niti, nanula lizoho la hao, muuna yo yainzi . . .

²⁷⁹ Kana ulumela kuli—kana ulumela kuli Andreasi ha na bulelezi Simoni kuli atahé abone Mesia yene ba fumaní, mi ha yo taha Fapila pata ya Mulena Jesu? Kakuba kuli uyemi fapila Sesiñwi cwale, tapelo ya hae. Mwabona, A mubulelela yo nali yena. U lumela kuli Mulumu wakona ku ni bulelela yo uli yena? Haiba u lumela, Wakona kueza cwalo. Kana seo si ka ku susueza kulumela ka pilu ya hao kaufela? Kikuli si ka eza cwalo ku mina babañwi kaufela? [Kopano ili, “Amen.”—Mu.]

²⁸⁰ Cwale muuna yo unanuzi mazoho a hae mwahalimu, kuli kaufela sa bulelezwi . . . Ha ni zibi; Ni ka tokwa kuliza tepu, mwabona. Kamba ibile sikamañi kaufela, ki sa niti. Kana ku

cwalo, sha? [Muzwale uli, "Amen."—Mu.] Ku lukile. Kamba neli sikamañi kaufela, ki sa niti.

Bo. Shepherd, mulumele ka pilu yamina kaufela. "Haiba u kona ku lumela."

²⁸¹ Cwale zeo ha li shutani ni za Na bulezzi, "Libizo la hao ki wena Simoni, mwana Jonasi." Cwale haiba fela uka lumela, kona fela zeli za butokwa. Mwabona? Cwale ki sikamañi? Na sepisize ona cwalo. Na file sepiyo yeo. Zeo libonisa kuli Utensi mo. Isini fela na; Yena uku mina. U mwa Mubili wa balumeli ba Hae.

²⁸² Kalibe yomunyinyani, yalila ni kulapela, ni toho ya hao fafasi. Ukatazwa ki kansa. Haiba hauna kusaba, kono uka lumela, Mulimu uka ku konisa kulumela. Uka si mbwinja, luli. Boma. Hood, mulumele ka pilu ya mina kaufela cwale, kuli Jesu Kreste wa mi folisa, mi mwakona kuba ni se mu kupile kaufela. Cwale muka lumela ka pilu ya mina kaufela? Amen.

²⁸³ Yainezi bukaufi ni mina foo ki kalibe yana ni butata bwa mwamba, butata bwa pilu, matata. Haiba u lumela ka pilu ya hao kaufela, wakona kuba ni foliso ya hao. Kikuli u lumela ka pilu ya hao kaufela, wa i amuhela? Wa amuhela nji? Ku lukile.

²⁸⁴ Muuna yoo foo yana ni tusolondo kwa mainelo, kana ulumela kuli Mulimu wakona kufolisa tusolondo too ni kuku folisa? Nanuha.

²⁸⁵ U nahana sikamañi ka sona, wena yainzi bukaufi ni yena foo, yana ni mutuba? Kikuli ulumela kuli Mulimu wakona kufolisa mutuba woo mane ube hande?

²⁸⁶ Kalibe yainezi bukaufi ni lizoho la hao foo, ukula toho. I folile cwale. Nji cwani? Mwabona, tumelo ya hao ipetile lika. Kona fela zemuna ni kueza, ki kulumela.

²⁸⁷ Kiyo fa kalibe fa ni shuka. U lumela kuli Mulimu uka kueza hande, kalibe, yainzi foo ni shuka? U lumela kuli Mulimu wakona ku ni bulelela yo uli yena? Wa lumela? Boma. Robinson. Kona libizo la hao.

²⁸⁸ Beya lizoho la hao ku yena wa mutuba yoo, mwendi Mulimu uka mu tusa, ni yena. Haiba u lumela cwalo! Kikuli uka eza cwalo? Ku lukile, sha.

²⁸⁹ Kalibe yainezi bukaufi ni wena, beya lizoho la hao ku yena, sha, ukatazwa ki misinga kuopa. Kikuli ulumela kuli Mulimu uka folisa kuopa mwa misinga koo ni kukueza hande? Wa lumela, wakona kuba ni foliso ya hao, ni wena. Una ni kulumela cwalo.

²⁹⁰ Cwale yeo tiisezo. Mulimu u file sepiyo, cwale ki ba bakai babalumela kuli Kreste uteni mo? Mwa lumela cwalo? Cwale, kaufela mina ba ba bata, fapila Kubateni kwa Hae cwale, baba bata sishemo ku Yena, baba bata sishemo kwa mioyo ya mina, mi mubata ku Mu amuhela cwale hamuli fapila Kubateni kwa Hae cwana, muzibahalile. Cwale Ni . . .

²⁹¹ Mutu wakona kutaha mwahali mo ni mañiba a limapo mwa mazoho a hae, ni mokupunyize miutwa ni kubulela kuli, "Ki na Mulena." Muipi ufi kaufela wakona kueza cwalo. Kono, Bupilo! Mubili wa Mulena Jesu ukwa lizoho la bulyo la Bulena; ka nako Ya taha, nako ikabe ifelile, mubili wani hauka kuta mwa lifasi. Kono Moya wa Hae uteni mo, Bupilo bwa Hae bufa bupaki bwa Hae kakuba mo. Mwabona? "Ni kaba ni mina, mane mwahala mina, kuisa kwa mafelelezo a lifasi."

²⁹² Mi mubata sishemo kuzwa ku Yena cwale, kikuli mukayema fela kwa tapelo? Mwahala muyaho wo kaufela, mina baba... kaufela ko muinezi, kikuli muka yema? Mulimu ami fuyole, kwa mulaho kafoo. Yeo ki niti, muyeme ona cwalo. Muyeme fela ka mahutu, kona fela ze Ni bata kuli mueze. Amu yeme fela fa muzuzu, kwa tapelo. Haiba mu ka Mu yemela! Haiba u Mu swabela cwale, Uka yo ku swabela fapila Ndate; mi haiba—haiba u itakaleza kubulela za Hae cwale, Uka yo bulela za hao fapila Ndate. "Ni bata cwale kuamuhela Kreste kakuba Mupulusi waka. Ni bata kuli Ani taze ka Moya wa Hae ona fa. Ni bata Yena." Muyeme fela ona cwalo fa nako nyana, kwa tapelo, haiba muka kona. Amu yeme. Yeo ki niti. Ni bata... Ni ikutwa kuzamaiswa kueza se, kueza kat.... Ye ki pizo yakwa aletare. Amu yeme. Haluna aletare kwa kutaha; pilu ya hao kona aletare. Mu kumule fela ku sa lumela kaufela, ni kuziba kuli Utensi mo cwale. Amu yeme ki foo, mina ba ba bata ku amuhela Kreste cwale, fapila Kubateni kwa Bumulimu ko muutwa, zeo lipakilwe cwale.

Cwale halu inamiseni litoho za luna.

²⁹³ Mulena Jesu, ba ki ba Hao. U bulezzi kuli, "Hakuna mutu yakona kutaha ku Na konji Ndate Ha mu bizzare." Mi cwale kuya ka sayansi, habakoni kunanula mazoho a bona; mulao wa bukiti ubulela kuli mazoho a luna alukela kukuta mwatasii. Kono kuna ni bupilo kubona, mi bupilo bwani butisizwe bukaifi ni Bupilo Bobusafeli, Kreste. Mi baezize buketelo mwa lipilu za bona, kuli ba kauhani ni lifasi. Mi ba nanuzi mazoho abona ni kuyema ka mahutu, bahanyeza mata a bukiti, kuli kuna ni bupilo mwahali moo. Kacwalo lwa hanyeza mulao wa bukiti bwa lifasi ni ku sa lumela!

²⁹⁴ Ka Libizo la Jesu Kreste, ki ba Hao. Ki limpo za lilato la Evangeli. Ki kupuzo ya Liñusa, busihu cwana, mi ni... Kubateni kwa Hao hamoho ni luna. Beya mabizo abona mwa Buka ya Bupilo ya Ngunnyana, Mwani, Mulena. Lu lapela kuli—kuli mañi ni mañi wa bona ayoba teñi Kwani, kakuba bana ba Hao, balatiwa ba Hao.

²⁹⁵ Ba taze ka Moya o Kenile wa Mulimu, ukene mwa lipilu zabona. Mi bupilo bwa bona bu cince luli ka Mata a Mulimu Yamata kaufela, kuli kuishuwa ni lilato ni musa ni kuishuwa

libube kubona, ni ciseho ya kubona babañwi ba puluswa, bene bali nako yeñwi mwa buino bwa bona. Lumeleza cwalo, Mulena.

²⁹⁶ Nto fela yelukona kueza, Mulena, ki kulumela. Mi ba yemi kuba kupuzo ya kulumela kwa bona. Mi cwale ka tumelo yaka ni tumelo yabona, hamoho, lu i lula fa aletare ya Hao, ka tumelo. Mi bona ki sitabelo se si beilwe fateni, silibezezi Mwana Mulimu ya talekilwe kuba sitabelo kuli aba amuhele mwa Mubuso wa Hae. Lumeleza cwalo, Mulena. Ona fa cwana ki ba Hao, ka Libizo la Jesu Kreste.

²⁹⁷ Cwale mina baba Mu lumela ka lipilu za mina kaufela, baba yemi, mu nanule mazoho a mina, muli, “Na Mu lumela. Na Mu amuhela ona fa cwale kuba Muliululi waka, mi Ni kupa kolobezo ya Moya o Kenile.” Amunanule mazoho. Mulimu ami fuyole.

Cwale mwakona kuina.

²⁹⁸ Mi Ni bata kuli muye kwa keleke yeñwi, cwale, ona fa kapili.

²⁹⁹ Kamuso busihu lukaba ni—ni mukopano wa kolobezo ya Moya o Kenile, kamuso busihu, ona mwa muyaho woo. Cwale, kuna ni kufiteleza hahulu tumelo kokuñata kokuliteni ko ba biza kuli kona kolobezo ya Moya o Kenile, kono zeo halitalusi kuli hakuna Moya o Kenile wa niti. Kuna ni Moya o Kenile wa niti wa Mulimu, ka kuswana fela. Mi Ni lumela kuli Uka topana ni luna mo kamuso busihu.

³⁰⁰ Cwale, ki ba bakai mwa muyaho mo baba kolwa kuli lukwa nako ya maungulo? [Kopano ili, “Amen.”—Mu.] Ki ba bakai baba kolwa kuli ye ki Niti, Linzwi li lukela kuba ka nzila ye mwa mazazi a maungulo? Munanule mazoho a mina. [“Amen.”] Ki ba bakai ba mina balumeli? Munyanyise mazoho. [“Amen.”] Ku lukile. Jesu nabulezi Manzwi aa, “Lisupo ze likaya ni baba lumela, haiba u mulumeli.”

³⁰¹ Cwale ki ba bakai babatokwile Kreste mwa mibili ya mina? Munanule mazoho a mina. Ku lukile, mina balumeli ba bainzi ni bona, amu ba beye mazoho amina ku mañi ni mañi. Mi mo mu lapelelanga mwa likeleke za mina, kona mo mu swanela kulapelela ni moo. Usike wa itapelela ili wena. U mu balepelele kwateni; basweli ba mi lapelela ni bona. Mi Bibele ibulezi kuli, “Ba ka beya mazoho a bona fa bakuli, bao baka foliswa.” Cwale mulapele ka nzila ya mina, mi ka sepiso.

³⁰² Mulena Jesu, ki ba Bao. Ba amuhele mwa Mubuso wa Hao. Mi u folise mañi ni mañi, Mulena; ni litaulo zee. Ka Libizo la Mulena Jesu Kreste, lumeleza cwalo, Mulena. Satani u latehezwi ki mata a hae. Mi cwale Mata a Mulimu Yamata Kaufela afolise mañi ni mañi.



JEHOOVA-JAIRE ² LOZ64-0403
(Jehovah-Jireh ²)

Liñusa le ka Muzwale William Marrion Branham, neli katalizwe lwa pili mwa Sikuwa la Bufaifi manzibwana, Lungu 3, 1964, ili fa 4-H Club Barn mwa Louisville, Mississippi, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatisizwe ni ku hasanyiwa kiba Voice Of God Recordings.

LOZI

©2020 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org